

四庫全書

史部

欽定四庫全書

史部

江西通志卷二十八

詳校官監察御史臣左周

檢討臣德生覆勘

總校官知縣臣楊懋珩

校對官中書臣高 中

謄錄監生臣萬朝宗

欽定四庫全書

江西通志卷二十八

兵衛

師田之制兵寓於民井賦既改兵民迺分明設衛所  
軍用開屯流以戍徒領以世勲有事執戈罷則耕耘  
坐無糜食儲有餘困泊乎後來戶耗軍貧秋南春北  
殆同雁臣

聖恩優恤靡惠不均宿逋既免運耗仍存作兵衛志

國朝順治二年江西省南昌府設提督三年贛州府設南贛總兵十六年九江府設九江總兵十八年移南昌提督駐建昌府康熙四年還駐省城七年裁提督及九江總兵設南瑞鎮十三年又改鎮復提以趙國祚為提督移駐九江府增設袁臨總兵趙應奎撫建總兵許貞十四年增設撫建提督趙賴分提撫建廣饒南吉六府而趙國祚則分提九瑞袁臨南贛六府復設九江總兵馬雲程增設南昌水師總兵蔡璋饒

南總兵高登科十七年撫建提督趙賴離任以撫建  
總兵許貞為撫建提督以陳平為撫建總兵十八年  
九江總兵馬雲程離任九江鎮裁十九年水師總兵  
蔡璋離任水師總兵裁九瑞提督趙國祚回旗以撫  
建提督許貞為全省提督撫建提督裁二十一年袁  
臨總兵趙應奎陞任袁臨鎮裁二十二年全省提督  
許貞離任全省提督裁撫建鎮亦裁仍設南瑞鎮以  
撫建總兵陳平為南瑞總兵駐劄南昌今就現設撫

標南瑞贛南二鎮及寧州等三十四營官弁兵丁詳  
明開載至江西都司所轄衛所土弁順治初已經奉  
裁屯田籽粒康熙九年歸并各縣徵解衛所各軍聽  
督糧道僉撥造運雍正四年都司裁所管轄事宜分  
歸布政司督糧道管理具附於後

南昌府

撫標左右兩營駐防省城原額經制馬一步九戰三守  
七官一十六員兵一千五百名各官自備征馬四十

四疋營馬一百五十疋除康熙二十四年三十八年  
二次奉裁外見設遊擊二員守備二員千總四員把  
總八員馬戰兵九十六名步戰兵一百九十二名守  
兵六百七十六名各官自備征馬四十四匹兵戰馬  
九十六匹

南瑞鎮標前後兩營駐劄省城原額經制馬一步九戰  
三守七官二十四員兵二千五百一十八名各官自  
備征馬四十四疋營馬二百匹除康熙二十四年三

十八年二次奉裁外見設總兵一員遊擊二員守備  
二員千總四員把總八員馬戰兵一百五十名步戰  
兵二百五十名守兵一千五十名各官自備征馬六  
十匹兵戰馬一百五十匹雍正四年奉文後營遊擊  
帶千把總各一員馬戰守兵丁三百名移駐銅鼓營  
七年補設千把總官各一員馬戰兵二十九名步戰  
兵六十六名守兵二百五名各官自備征馬四匹兵  
戰馬二十九匹



南昌城守營駐防南昌府原額經制官三員馬步戰守兵丁二百三十名除康熙三十四年奉裁外見設守備一員千總一員把總一員馬戰兵二十三名步戰兵三十九名守兵一百六十一名各官自備征馬八匹兵戰馬二十三匹

南昌水師營駐防南昌府原額經制官三員戰守兵丁二百六十名除康熙三十四年奉裁外見設守備一員千總一員把總一員步戰兵七十名守兵一百八

十二名各官自備征馬八匹兵無戰馬額設沙唬船  
存營派兵護送往來差使

寧州銅鼓營駐防銅鼓石原額經制官八員馬步戰守  
兵丁一千名除康熙二十二年三十四年二次奉裁  
外只設守備一員把總一員馬戰兵二十名步戰兵  
三十三名守兵一百四十名各官自備征馬六匹兵  
戰馬二十匹雍正四年奉文移駐南昌鎮標後營遊  
擊一員千把總各一員馬戰兵二十九名步戰兵六

十六名守兵二百五名各官自備征馬十匹兵戰馬二十九匹七年復奉添設把總一員征馬二匹其原設守備把總駐防萬載縣

武寧營駐防武寧縣原額經制官二員馬步戰守兵丁二百四十名除康熙二十二年奉裁外見設守備一員把總一員馬戰兵一十八名步戰兵三十名守兵一百二十六名各官自備征馬六匹兵戰馬一十八匹

瑞州府

瑞州營駐防瑞州府原額經制官三員馬步戰守兵丁  
三百三十名除康熙二十二年三十四年二次奉裁  
外見設守備一員把總一員馬戰兵二十名步戰兵  
三十三名守兵一百四十名各官自備征馬六匹兵

戰馬二十匹

雍正四年移駐銅鼓營千總帶兵  
丁六十名征馬二匹分駐新昌縣

袁州府

袁州協營兼轄臨江駐劄袁州府原額經制官八員馬

步戰守兵丁八百名除康熙二十二年三十四年二次奉裁外見設副將一員中軍都司僉書一員千總二員把總四員馬戰兵七十名步戰兵一百一十七名守兵四百九十名各官自備征馬二十八匹兵戰馬七十匹

雍正四年原設銅鼓營守備帶領把總一員兵丁一百二十名征馬六匹駐防萬載

縣

## 臨江府

樟樹營駐防清江縣樟樹鎮原額經制官二員馬步戰

守兵丁三百名除康熙二十二年三十四年二次奉  
裁外見設守備一員把總一員馬戰兵二十名步戰  
兵三十三名守兵一百四十名各官自備征馬六匹  
兵戰馬二十匹

吉安府

吉安營駐防吉安府原額經制官五員馬步戰守兵丁  
七百名除康熙二十二年三十四年二次奉裁外見  
設叅將一員中軍守備一員千總一員把總二員馬

戰兵四十四名步戰兵七十三名守兵三百八名各官自備征馬十八匹兵戰馬四十四匹

永豐營駐防吉永豐縣原額經制官二員馬步戰守兵丁一百八十名除康熙三十四年奉裁外見設守備一員把總一員馬戰兵一十八名步戰兵三十名守兵一百二十六名各官自備征馬六匹兵戰馬十八匹

龍泉營駐劄龍泉縣原額經制官二員馬步戰守兵丁

一百八十名除康熙三十四年奉裁外見設守備一員把總一員馬戰兵一十八名步戰兵三十名守兵一百二十六名各官自備征馬六匹兵戰馬十八匹萬安營駐防萬安縣原額經制官二員馬步戰守兵丁二百名除康熙二十四年奉裁外見設守備一員把總一員馬戰兵二十名步戰兵三十三名守兵一百四十名各官自備征馬六匹兵戰馬二十匹

永新營駐劄永新縣原額經制官二員馬步戰守兵丁



二百名除康熙三十四年奉裁外見設守備一員把  
總一員馬戰兵二十名步戰兵三十三名守兵一百  
四十名各官自備征馬六匹兵戰馬二十匹

### 撫州府

撫州營駐防撫州府原額經制官八員馬步戰守兵丁  
七百名除康熙二十二年三十四年二次奉裁外見  
設守備一員千總一員把總二員馬戰兵四十名步  
戰兵六十七名守兵二百八十名各官自備征馬十

匹兵戰馬四十匹

建昌府

建昌營駐防建昌府原額經制官八員馬步戰守兵丁九百五十名除康熙三十四年奉裁外見設遊擊一員中軍守備一員千總一員把總二員馬戰兵六十六名步戰兵一百名守兵四百二十名各官自備征馬一十六匹兵戰馬六十匹

廣昌營駐防廣昌縣原額經制官二員馬步戰守兵丁

二百名除康熙三十四年奉裁外見設守備一員把  
總一員馬戰兵二十名步戰兵三十三名守兵一百  
四十名各官自備征馬六匹兵戰馬二十匹

### 廣信府

廣信營駐防廣信府原額經制官五員馬步戰守兵丁  
六百名除康熙三十四年奉裁外見設叅將一員守  
備一員千總一員把總二員馬戰兵六十名步戰兵  
一百名守兵四百二十名各官自備征馬一十八匹

兵戰馬六十匹

鉛山營駐防鉛山縣原額經制官二員馬步戰守兵丁二百名除康熙三十四年奉裁外見設守備一員把總一員馬戰兵二十名步戰兵三十三名守兵一百四十名各官自備征馬六匹兵戰馬二十匹

饒州府

饒州營駐防饒州府原額經制官五員馬步戰守兵丁六百名除康熙三十四年奉裁外見設叅將一員守

備一員千總一員把總二員馬戰兵六十名步戰兵一百名守兵四百二十名各官自備征馬一十八匹  
兵戰馬六十匹

鄱陽營駐防餘干縣康山原額經制官二員馬步戰守兵丁二百名除康熙三十四年奉裁外見設守備一員把總一員步戰兵五十三名守兵一百四十名  
浮梁營駐防浮梁縣原額經制官二員馬步戰守兵丁二百名除康熙三十四年奉裁外見設守備一員把

總一員馬戰兵二十名步戰兵三十三名守兵一百四十名各官自備征馬六匹兵戰馬二十匹

南康府

南康營駐防南康府原額經制官二員馬步戰守兵丁二百二十名除康熙三十四年奉裁外見設守備一員把總一員馬戰兵二十二名步戰兵三十七名守兵一百五十四名各官自備征馬六匹兵戰馬二十匹

九江府

九江協營駐防九江府兼轄南康原額經制官一十五員馬步戰守兵丁一千七百名除康熙二十四年三十四年二次奉裁外見設副將一員中軍都司僉書一員千總二員把總四員馬戰兵八十名步戰兵一百三十三名守兵五百六十名各官自備征馬二十八匹兵戰馬八十匹

南湖水師營駐劄湖口縣原額經制官八員步戰守兵

八百二十六名除康熙二十四年三十四年二次奉裁外見設守備一員千總一員把總二員步戰兵一百七名守兵二百八十名各官自備征馬十匹兵無戰馬額設沙唬船存營派兵護送往來差使

南安府

南安營駐防南安府原額經制官八員馬步戰守兵丁一千名除康熙二十二年三十四年二次奉裁外見設叅將一員中軍守備一員千總二員把總四員



馬戰兵六十名步戰兵一百名守兵四百二十名各官自備征馬二十四匹兵戰馬六十匹

文英營駐防崇義縣原額經制官二員馬步戰守兵丁四百名除康熙二十二年三十四年二次奉裁外見設守備一員把總一員馬戰兵二十二名步戰兵三十七名守兵一百五十四名各官自備征馬六匹兵戰馬二十二匹

贛州府

南贛鎮駐劄贛州府原額經制馬一步九戰三守七官  
二十四員馬步戰守兵丁三千名除康熙二十二年  
三十四年二次奉裁外見設總兵一員遊擊三員守  
備三員千總六員把總一十二員馬戰兵一百八十  
九名步戰兵三百一十五名守兵一千三百二十三  
名各官自備征馬八十二匹兵戰馬一百八十九匹  
贛州城守營駐防贛州府原額經制官四員馬步戰守  
兵丁二百名除康熙三十四年奉裁外見設守備一

員把總一員馬戰兵二十名步戰兵三十三名守兵一百四十名各官自備征馬六匹兵戰馬二十匹

寧都營駐防寧都縣原額經制官八員馬步戰守兵丁六百名除康熙三十四年奉裁外見設叅將一員守備一員千總二員把總四員馬戰兵六十名步戰兵一百名守兵四百二十名各官自備征馬二十四匹兵戰馬六十匹

興國營駐防興國縣原額經制官四員馬步戰守兵丁

三百名除康熙三十四年奉裁外見設守備一員千  
總一員把總二員馬戰兵三十名步戰兵五十名守  
兵二百一十名各官自備征馬十匹兵戰馬三十匹  
永鎮營駐防瑞金縣原額經制官二員馬步戰守兵  
二百名除康熙三十四年奉裁外見設守備一員把  
總一員馬戰兵二十名步戰兵三十三名守兵一百  
四十名各官自備征馬六匹兵戰馬二十匹

橫岡營駐防定南縣原額經制官二員馬步戰守兵丁

二百名除康熙三十四年奉裁外見設守備一員把  
總一員馬戰兵二十名步戰兵三十三名守兵一百  
四十名各官自備征馬六匹兵戰馬二十匹

羊角營駐防會昌縣原額經制官二員馬步戰守兵丁  
二百名除康熙三十四年奉裁外見設守備一員把  
總一員馬戰兵二十名步戰兵三十三名守兵一百  
四十名各官自備征馬六匹兵戰馬二十匹

已上通省撫鎮標協營更定營制共三十四營額

設官共一百六十七員各官自備征馬五百二十

匹裁定實存兵丁總一萬四千三百一十二名

內馬

戰兵一千三百八十九名步戰兵二千五百九十二名守兵一萬三百三十一名各兵戰

馬一千三百八十九匹

歲額支俸薪餉乾銀二十四萬五千一百七十一

兩七錢六分四釐閏年支銀二十六萬四千四百

六十四兩一錢六分四釐

額該兵米五萬一千五百二十三石二斗

江西布政司督糧道管轄衛所屯田屯糧屯軍并造船  
領運官并旗丁實數

南昌前衛

即前

原額屯田地并基塘山堰共六百二十

七頃六十六畝一分六釐四毫四絲二微五纖八沙

內除雍正五年奉文東流建德二縣屯田地五十三

頃八十六畝一分八釐六毫四絲二忽歸入江南池

州府賦役徵解外實在屯田地五百七十三頃七十

九畝九分七釐七毫九絲八忽二微五纖八沙又除

報荒崩田地二十頃六十五畝三釐七毫六絲七忽  
七微又續報墾墾田地三頃五十五畝六毫九忽見  
在成熟屯田地五百五十六頃六十九畝九分四釐  
六毫三絲九忽五微五纖八沙共徵籽粒折餘席竹  
加增銀四千四百四兩九錢八分三毫三絲三忽九  
纖外帶徵丁銀一百四十四兩一錢三分五毫三絲  
原委管屯官徵解康熙九年改并就近九江府彭澤  
縣徵解



原額漕船一百一十一隻每船旗丁一名散軍九名  
自經叛變逃亡將散軍操軍牙軍設官舍餘現今領  
運造船九十七隻缺船一十四隻現在僉補

原額祖軍并附官舍餘共一千八百八十七戶旗丁  
一百一十名散軍九百九十名順治十三年編審清  
查止存四百八十五戶

額設掌印領運守備一員領運千總一員輪流掌印  
領運隨幫百總一員催押空船回南

南昌左衛

即後

原額屯田地并基塘山堰共一千九十

四頃九十五畝三分二釐九絲四忽內除荒崩田地  
二百五十二頃八十二畝六分一釐二絲三微八纖  
又續報墾陞老荒田地及額外新生共一百三十二  
頃五十八畝六分三釐六毫三絲二忽二微八纖見  
在成熟田地九百七十四頃七十一畝三分四釐七  
毫五忽九微共徵籽粒折餘蓆竹加增銀七千七百  
四十九兩三錢八分六釐四毫七忽三微四纖外帶

徵丁銀二百五十三兩六錢八分三釐二毫六絲原  
委管屯官徵解康熙九年改就近歸并九江府德化  
德安瑞昌及南康府星子四縣徵解

原額漕船一百一十一隻每船旗丁一名散軍九名  
自經戊子甲寅二次叛變逃亡將散軍操軍牙軍設  
官舍餘現今領運造船一百零五隻缺船六隻現在  
僉補

原額旗散各軍共一千一百一十名順治十三年編

審僅存其半

額設領運千總二員輪流督造領運隨幫百總一員  
催空船回次

袁州衛原額屯田二百三十七頃畝內除荒塞田一百  
四十七頃五十九畝又續報墾陞田一十二頃四十  
五畝見在成熟屯田一百一頃八十六畝共徵籽粒  
折餘加增銀一千七十兩八錢四分七釐七毫五絲  
外帶徵丁銀三十四兩八錢七分四釐一毫八絲原

委管屯官徵解康熙九年改就近歸并袁州府宜春  
分宜萍鄉萬載四縣徵解

原額漕船一百一十隻每船旗丁一名散軍九名自  
經叛變逃亡將散軍操軍牙軍舍餘現今領運造船  
二十七隻缺船八十三隻

原額祖軍六千戶順治六年清查僅存一百九十六  
戶

額設守備一員千總一員專司督造領運隨幫百總

一員催空船回南

九江衛

明季屬江南統轄  
順治初年改歸江西統轄

原額屯田地一千八

百一十七頃八十畝七分六釐六毫內除荒崩田地

七百二十七頃六十二畝二分七釐七毫七絲一忽

又續報墾陞老荒及額外新生田地四百二十頃三

十五畝九分八釐七絲九忽四微見在成熟屯田地

一千五百一十頃五十四畝四分六釐九毫八忽四

微共徵籽粒加增銀一萬一千一百二十九兩六錢

五分二釐三毫七絲三微外帶徵丁銀三百六十二兩四錢五分二釐四毫一絲原委管屯官徵解康熙九年改就近歸并九江府德化德安瑞昌湖口彭澤及南康府星子六縣徵解

外雍正三年開墾老荒及額外新生田地四十四畝

五分五釐五毫所增屯糧銀定例六年起科年限尚未屆滿故未編入

原額漕船一百六十五隻每船旗丁一名散軍九名內船一百三隻領運江西糧米其六十二隻領運池州糧米康熙九年改設為前後兩幫前幫一百零三

卷二十八  
隻後幫船六十二隻現今領運船一百六十三隻缺  
船二隻

原額祖軍九百七十二戶餘丁三千六百四十四名  
逃絕一百六十三戶

額設前幫千總二員後幫千總二員督造領運隨幫  
百總二員催空船回次

贛州衛原額屯田八百一十五頃五十畝五釐又餘田  
五十八分計田一百七十四頃畝內除荒蕪田七百



三頃七十五畝五釐又續報墾陞田一百三十六頃  
九畝九分五釐九毫三絲一忽見在成熟屯田四百  
二十一頃八十四畝九分五釐九毫三絲一忽共徵  
正折餘徭加增銀四千一百三十兩九錢八分六釐  
五毫八絲外帶徵丁銀一百二十四兩四錢四分八  
釐五絲原委管屯官徵解康熙九年改就近歸并贛  
州府贛縣瑞金雩都興國及南安府崇義五縣徵解  
會昌所原額屯田二百二十八頃三十畝內除荒塞田

一百二十九頃二十九畝又續報墾陞田一百一十七頃四十四畝見在成熟屯田二百一十六頃四十五畝共徵正折銀一千七百九十七兩七錢八釐七毫六絲五忽七微二纖外帶徵銀五十八兩八錢六分六釐二絲順治初歸并贛州衛徵解康熙九年改歸會昌縣徵解

信豐所原額屯田二百四頃九十一畝內除荒蕪田一十九頃六十一畝七分九釐又續報墾陞田一十一

頃五十六畝一分三釐一絲見在成熟屯田一百九十六頃八十五畝三分四釐一絲共徵正折餘糧銀一千七百九十六兩四分一釐七毫二絲四忽外帶徵丁銀五十六兩六錢九分六釐八毫九絲順治初歸并贛州衛徵解康熙九年改歸信豐縣徵解

南安所原額屯田一百九十頃八十畝內除荒決田一百六十二頃六十九畝五分又續報墾陞田四十五頃二十七畝三分五釐五毫三絲五忽見在成熟屯

田七十三頃三十七畝八分五釐五毫三絲五忽共  
徵正折銀五百二十九兩九錢七分四釐三毫一絲  
六忽外帶徵丁銀一十七兩三錢五分四釐二絲順  
治十二年歸并贛州衛管理徵解康熙九年改歸大

庾縣徵解

本所原無  
額設旗軍

原額漕船本衛三十隻會昌所十五隻信豐所十五  
隻共六十隻每船旗丁一名散軍九名自經叛變逃  
亡將散軍操軍牙軍舍餘現今領運造船五十四隻

缺船六隻現在僉補

原額祖軍二千九百七十戶順治六年清查僅存六百二十五戶

額設守備一員千總一員督造領運隨幫百總一員  
催空船回次

吉安所原額屯田一百一十二頃三十九畝五分一釐  
內除荒塞田九十頃九十七畝八分七釐又續報墾  
陞田四十八頃一分三釐三絲四忽三微見在成熟

屯田六十九頃四十一畝七分七釐三絲四忽三微  
共徵正折餘徭加增銀六百七十九兩七錢九分八  
釐二毫九絲外帶徵丁銀二十一兩六錢六分八釐  
八毫九絲原委管屯官徵解康熙九年改并就近吉  
安府廬陵龍泉二縣徵解

原額漕船九十八隻每船旗丁一名散軍九名自經  
叛變逃亡現今漕船止六十六隻缺船三十二隻

原額屯軍三百一十四戶操軍八百二十七名見在

屯操軍共六百三戶

額設十總二員督造領運隨幫百總一員僱空船回  
南

安福所原額屯田一百一十七頃一十畝一分八釐內  
除荒塞田四十頃二十五畝九分八釐又續報墾陞  
田一十五頃七十五畝四釐八毫四絲二微九纖四  
沙四塵六埃一渺六漠六遂九廵見在成熟屯田九  
十二頃五十九畝二分四釐八毫四絲二微九纖四

沙四塵六埃一渺六漠六遂九巡共徵正折餘徭加  
增銀一千三百三十二兩九錢五分二釐四毫九絲  
外帶徵丁銀四十兩三錢七分一釐一毫四絲原委  
管屯官徵解康熙九年改併就近吉安府安福縣徵  
解

原額漕船四十二隻每船一隻旗丁一名散軍九名  
自經叛變逃亡將散軍操軍牙軍舍餘現今領運造  
船二十五隻缺船一十七隻



原額運軍六百五十五名操軍五百二十六名見在屯操軍共二百三十四戶

額設千總二員督造領運隨幫百總一員押空船回次

永新所原額屯田一百二十八頃八十九畝二分三釐內除荒決田二十四頃八十六畝六分一釐二毫六絲七忽又續報墾陞田一十六頃一十畝一分五釐見在成熟屯田一百二十頃一十二畝七分六釐七

毫三絲三忽共徵正折餘徭加增銀一千三百二十四兩五錢四分一釐三毫一忽二微外帶徵丁銀四十三兩三錢七分二釐一毫四絲原委管屯官徵解康熙九年改歸就近永新縣徵解

原額漕船三十七隻每船旗丁一名散軍九名自經叛變逃亡將散軍操軍牙軍舍餘充運造船三十一隻缺船六隻

原額屯軍三百七十戶操軍四百二十名現在屯操

軍共二百八十八戶

額設千總二員督造領運隨幫百總一員押空船回  
次

龍泉所原額屯田一十七頃七十畝內除原荒田八頃  
一十畝已續報墾陞抵補共徵折餘銀一百四十七  
兩六錢六分六釐外帶徵丁銀四兩八錢三分五釐  
三毫三絲順治十三年本所屯軍屯糧俱歸併安福  
所管理將守禦所千總裁汰屯銀改就近龍泉縣徵

解

本所未設漕船旗  
軍奉文改編解部

撫州所原額屯田地并基塘山共三百八十九頃四十  
六畝五分七釐一毫九絲九忽內除雍正五年奉文  
建德縣屯田地基塘山三百一十八頃六十七畝五  
分二釐八毫八絲五忽歸入江南池州府賦役徵解  
外實在屯田并基塘山七十頃七十九畝四釐三毫  
一絲四忽內除荒塞田基塘四十七頃五十七畝二  
分二釐一毫六絲七忽見在成熟屯田二十三頃二

十一畝八分二釐一毫四絲七忽共徵正折加增銀  
一百一十四兩二錢五分八釐五毫外帶徵丁銀三  
兩七錢四分一釐四毫委饒州府餘干安仁二縣徵  
解

原額漕船六十六隻每船旗丁一名散軍九名自經  
叛變逃亡將散軍操軍牙軍舍餘充運造船三十五  
隻缺船三十一隻

原額屯軍六百六十戶見在三百二十四戶

額設千總二員督造領運隨幫百總一員押空船  
回南

建昌所原額屯田九十頃三十畝內除荒蕪田四十頃  
六十四畝六分六釐六毫二絲五忽又續報墾陞田  
三十四頃三畝九分八毫九絲三纖見在成熟屯田  
八十三頃六十九畝二分四釐二毫六絲五忽三纖  
共徵正折餘徭加增銀一千一百五兩三錢二釐一  
毫七絲四忽四微六纖二沙外帶徵丁銀三十六兩

一錢九分三釐一毫四絲八忽三微四纖原委管屯  
官徵解康熙九年改併就近建昌府廣昌縣徵解  
原額漕船四十七隻每船旗丁一名散軍九名自經  
戊子甲寅二次叛變逃亡將散軍操軍牙軍舍餘充  
運造船三十二隻缺船一十五隻

原額屯軍四百七十戶見在二百八十八戶

額設千總二員督造領運隨幫百總一員催空船回  
次

廣信所原額屯田二百二十頃六十畝內除荒塞田一百四十頃六十九畝四分四釐九毫又續報墾陞田五畝七分五釐見在成熟屯田七十九頃九十六畝三分一毫共徵正折加增銀八百二十一兩八錢三分二釐五毫六絲六忽五微七纖五沙外帶徵丁銀二十六兩九錢一分九毫三絲原委守禦所千總徵解康熙九年改歸就近廣信府上饒玉山廣豐興安四縣徵解



原額漕船四十三隻每船旗丁一名散軍九名自二次叛變逃亡將散軍操軍牙軍舍餘充運造船十三隻缺船三十隻

原額祖軍四百三十戶見在一百一十七戶

額設千總二員督造領運隨幫百總一員押空船回南

鉛山所原額屯田二百三十一頃一十五畝內除荒蕪田一百八十九頃七十五畝又續報墾陞田一頃六

十畝二分見在成熟田四十三頃畝二分共徵正折  
增銀四百三十六兩四錢七分三毫外帶徵丁銀一  
十四兩一錢九分二釐二毫三絲原委守禦所徵解  
康熙九年改併就近廣信府鉛山弋陽貴溪興安四  
縣徵解

原額漕船四十六隻每船旗丁一名散軍九名自二  
次叛變逃亡將散軍操軍牙軍舍餘充運造船一十  
五隻缺船三十一隻

原額軍四百六十戶見在一百三十五戶

額設千總二員督造領運隨幫百總一員押空船回  
次

饒州所原額屯田地三百四頃二十七畝七釐八毫六  
絲九忽五微內除雍正五年奉文建德縣屯田地二  
百九頃一十八畝七分一釐八毫二絲九忽五微歸  
入江南池州府賦役徵解外實在屯田九十五頃八  
畝三分六釐四絲內除荒塞田一頃二十三畝一分

八釐六毫五忽見在成熟屯田九十三頃八十五畝  
一分七釐四毫三絲五忽共徵正折餘糧加增銀九  
百四十五兩九錢一分七毫八絲外帶徵丁銀三十  
兩九錢七分三釐八毫七絲原委管屯官徵解康熙  
九年改就近饒州府鄱陽縣徵解

原額漕船六十七隻係所藩兩軍并舍餘承造見造  
船二十九隻缺船三十八隻

原額屯軍三百五十八名藩軍一百七十四名見在

屯藩軍共二百六十一名

前明分藩饒州因有藩軍後藩王廢即將藩軍承造

運領

額設千總二員督造領運隨幫百總一員押空船回次

已上四衛八所見在成熟屯田地四千六百七十一頃九十三畝四釐二毫八絲四忽四微八纖二沙四塵六埃一渺六漠六遂九巡

實徵正折餘徭蓆竹加增銀共三萬九千五百一

十八兩三錢一分六毫四絲八忽六微八纖七沙

此項銀兩解督糧道以為造船及營造俸薪等費 外帶徵丁銀一千二百

七十四兩八錢六分四釐四毫三絲八忽三微四

纖

實在屯丁六千五十四丁康熙五十五六十及雍

正四年三屆編審滋生增益人丁三百三十二丁

欽奉

恩詔永不加賦

原編銀壹千貳佰柒拾肆兩捌錢陸分肆釐肆毫叁絲捌忽叁微肆纖雍正五年奉文攤入通省屯糧帶徵

附江西督糧道徵解漕糧款項

起解本色漕糧正改米五十萬一千三百二十六石五升八合一勺一抄七撮

副米二十六萬五千七百二石八斗一升八勺二撮一粟

脚耗米共四萬五千九百二十九石五斗三升九合

三勺一抄八撮七粟九粒五顆

內南昌新建二縣全書原無額編脚耗米

於油單內每正改米一石編給兌軍贈耗米三升共該米一千五百九十七石五斗四升三勺四撮五圭二粟又永新縣全書額編亦無脚耗米折銀三百七十三兩五分六釐以五錢一石買米共該米七百四十六石一斗一合二勺

耗費銀共三萬九千四百三十八兩二錢四分九釐

八毫八絲七忽三微六纖

內南昌新建進賢寧州武寧奉新高安德興等八州

縣全書原無額編脚耗銀於由單內每正改米一石編給兌軍贈耗銀三分共該銀三千七百一兩六錢



一分三釐一毫四絲五忽一微一纖又豐城靖安安  
福萬安四縣全書額編耗費銀不敷支給贈銀又予  
由單內編撥湊足贈耗銀一千二百一十一兩七錢  
九分二釐六毫一絲五忽一微九纖此項銀兩給  
解官收為信募夫船般  
運交納修倉等項之用

三六輕費銀六萬三千一兩二錢二分三釐五毫七

絲七忽五微八纖

以下七項  
俱屬隨漕

二升折銀一千五百一十三兩一錢九分四釐一毫

五絲三忽一微五纖

蘆蓆板木銀三千三百九十二兩一錢九分四釐七

毫二絲五忽五微一纖

脚耗銀四百一兩三錢二分八釐三毫三絲一忽三微一纖

過江湖銀一萬九千五百四十二兩七錢四分六釐八毫八絲九忽五微七纖

協濟各衛所運軍月糧倉米銀二萬七千一百二十九兩二錢六分九釐三毫三絲四微五纖四沙

淺船料價銀七千二十七兩八錢五分四釐六毫三

絲三忽八微

已上隨漕共銀一十二萬二千七兩八錢一分一釐六毫四絲一忽二微七纖四沙

歷代兵衛附攷

唐太宗貞觀十年分江東西荆豫等處為十道置府六百三十四府凡三等兵千二百人為上千人為中八百人為下府置折衝都尉一人左右果毅都尉一人長史兵曹別將各一人校尉六人凡民年二十為兵

六十而免睿宗景雲間始置節度使南則江浙荆湖

閩廣西則岐蜀北則河朔燕晉

文獻通考

宋太祖建隆元年選強壯卒定為兵樣分送江浙等諸

道其後又以木梃為高下之等給散諸州軍委長吏

都監等召募教習神宗熙寧元年詔江湖等諸路監

司察州兵揀不如法者免為民

同上

熙寧四年始詔諸路行保甲法

宋史

政和時諸路團成保甲六十一萬餘人

文獻通考

理宗淳祐四年詔募江淮失業強壯之人置武勝軍

五千人

續文獻通考

元世祖初江淮以南地盡南海則名藩列郡又各以漢軍及新附等軍戍焉各路立萬戶府各縣立千戶所以鎮壓各處其所部之軍第遷口糧府縣關支而各道以宣慰司元帥總之至元十一年敕哈達選部下蒙古軍五千人與漢軍分戍沿江堡隘為使傳往來之衛二十二年詔改江淮江西招討司為上下三萬

戶蒙古漢人新附諸軍相叅作三十三翼成宗元貞

二年天歷元年罷江西行省兵

同上

順帝至正十三年立義兵千戶水軍千戶所於江西

元史

明太祖洪武元年定衛所官軍將帥將兵之法自京師  
達於郡縣皆立衛所以五千六百人為一衛一千一  
百二十人為一千戶所一百一十二人為一百戶所  
每百戶所設總旗二名小旗十名通以指揮千百

戶等官領之有事征伐則詔總兵官佩印領之既旋則上所佩印於朝官軍各回本衛總兵官不得擅調各衛指揮使司指揮使一人指揮同知二人指揮僉事四人衛鎮撫二人陞授改調增置無定員其屬經歷一人知事一人有衛學者教授一人訓導一人

各衛所指揮使司掌軍旅防禦之事使同知僉事考選掌管衛事凡世流襲替優給優養報都指揮使司達所隸都督府移兵部每歲藩臬撫按察其賢否五

歲一考選軍政廢置之一人統衛事曰軍政掌印一人練兵一人屯田曰軍政僉書京操巡捕出哨備禦軍器漕運諸雜務曰見任管事編諸行伍曰帶俸差操凡撥軍補軍替軍選軍募軍竝統於掌印凡城池時葺浚之度其財力軍十三民十七鎮撫掌刑獄經歷典出納文移知事佐之軍民指揮使司亦如之

文獻通考

南昌衛食糧官四十六員操守旗軍一千四百四十



三名運糧旗軍二千三百三十六名袁州衛食糧官  
三十八員操守旗軍三百三十六名運糧旗軍八百  
一十二名贛州衛食糧官五十六員操守旗軍八百  
七十六名運糧旗軍六百二十五名吉安千戶所食  
糧官一十六員操守旗軍八百一十八名運糧旗軍  
一千一百五十名安福千戶所食糧官一十員操守  
旗軍五百五十四名運糧旗軍六百五十五名永新  
千戶所食糧官一十六員操守旗軍五百名運糧軍

四百二十六名會昌千戶所食糧官一十員操守旗  
軍五百一十八名信豐千戶所食糧官一十二員操  
守旗軍六百名南安千戶所食糧官一十二員操守  
旗軍三百五十三名饒州千戶所食糧官二十三員  
操守旗軍四百四十六名運糧旗軍八百七名撫州  
千戶所食糧官一十七員操守旗軍三百八十九名  
運糧旗軍七百八十一名建昌千戶所食糧官二十  
員操守旗軍五百八十五名運糧旗軍五百三十名

廣信千戶所食糧官一十七員操守旗軍七百七十  
三名運糧旗軍五百六十三名鉛山千戶所食糧官  
一十四員操守旗軍四百四十五名運糧旗軍五百  
六名九江衛屬江南管轄官軍員名不具載

江西大

志

宣德元年始遣御史分行天下郡縣清理軍伍時天  
下軍政既久而弊軍之奸黠者往往匿其籍或誣援  
良民充伍所司利奸人之賄輒從之民受枉比比遠

邇一轍上知其弊遂命御史四出清理令無枉民縱  
奸續文獻通考

正統十四年令各省召募民壯就令本地官率領操

練遇警調用

同上

按王材申教錄曰農夫終歲勤動出食以給兵兵  
終歲嬉遊而食民之食四方有警則調集者民兵  
也召募者民間壯夫也其軍興百費又民所供也  
衛所之兵無所事敵挑揀之議一出於口則怨望

囂然且軍職傲睨執祖宗之制以相懾不知祖宗之制豈以軍儲為養老周羸助嬉遊長子孫之具耶法意不明民日疲而兵日弱當其任者奈何徇情取悅苟安旦夕哉

嘉靖八年桂萼上天下兵籍僅九十七萬至胡松考輿地又止八十四萬五千八百

續文獻通考

按唐宋兵制皆取兵於民壯則入伍老則歸農即三代寓兵於農之遺意明季軍伍皆謫發罪人

充之使子孫世世執役謂之長生軍且謫發之地  
遠者萬里或數千里近者千餘里南北易調非其  
土性難以自存是以死傷逃竄者十常八九行伍  
實數無幾況有罪謫發者率皆奸民善於作弊毋  
惑乎其兵籍之虧也使當時議兵制者以前代之  
法為主而以其法參之則折衷於盡善矣

歷代屯田附考

唐開軍府以扞要衝因隙地置營田天下屯總九百九

十二司農寺每屯三頃州鎮諸軍每屯五十頃水陸  
腴瘠播植地宜與其功庸煩省收率之多少皆決於  
尚書省憲宗末江東西等處營田皆僱民或借庸以  
耕又以瘠地易上地民間苦之穆宗即位詔還所易  
地而耕以官兵耕官地者給三之一以終身

文獻通考

宋天禧末諸州屯田總四千二百餘頃江淮兩浙承偽  
制皆有屯田克復後多賦與民輸租第存其名紹興

六年右僕射張浚奏改江淮屯田為營田

同上

元成宗大德二年以贛州路所轄信豐會昌龍南安遠等處賊人出沒發寨兵及宗舊役弓手與抄數漏籍人戶立屯耕守以鎮遏之為戶二百六十五為田五百二十四頃六十畝

元史

明洪武初命諸衛分軍屯種各省荒田歲收籽粒為官軍俸糧每軍種田五十畝為一分或有多寡不等衛所軍士以三分守城七分屯種又有二八一九四六



中半等例皆隨地而異其耕種器具牛隻皆給於官  
續文獻通考

永樂三年更定屯田則例令各屯置紅牌一面寫刊  
於上每百戶所管旗軍一百一十二名或一百名七  
八十名千戶管十百戶或七百戶五百戶三四百戶  
指揮所管五十戶或三千戶二千戶提調屯田都指  
揮收子粒多寡不等除下年存種子外每歲軍用十  
二石正糧為法比較將剩餘并不敷子粒數目通行

計算定為賞罰都司并本衛指揮隔別委官點閱五年江西等處置按察司僉事一員盤量屯糧

同上

嘉靖四年題准將南昌衛饒州撫州所屯田坐落池州府地方許江西屯田僉事帶管凡詞訟有干屯政者聽其綜理仍給關防以便行事二十二年題准將南贛所屬衛所屯糧令屯田道派定呈報御史行各兵備道就近督徵

同上

按屯田之制兩漢不過數郡兩宋不過數路唐雖

有九百九十二所亦無實效惟明太祖加意於此  
視古最詳考其迹則衛所有閒地即分軍以立屯  
非若歷代於軍伍之外分兵置司者也考其制則  
三分守城七分屯種以言其數則外而遼東一萬  
二千三百八十六頃內極安如江西亦有五千六百  
二十三頃四十一畝有奇推之於南北二京浙湖  
山陝諸省尤極備焉則其於所謂數郡數路九百  
九十二所者豈足以比之哉

歷代漕運附考

唐高祖太宗時江淮漕租米至東都輸含嘉倉以車或  
馱陸運至陝而水行來遠多風濤覆溺之患其失嘗

十七八

新唐書

開元十八年宣州刺史裴耀卿朝集京師元宗訪以  
漕事耀卿條上便宜謂江東西送租庸調物歲以二  
月至揚州入斗門四月始渡淮入汴常苦水淺六七  
月乃至河口而河水方漲須八九月始得上河入洛

而漕路多梗船檣阻隘江東西人不習河事轉僱河師水手重為勞費其得行日少阻滯日多今漢隋漕路瀕河倉廩遺跡可尋當於河口置武牢倉鞏縣置洛口倉使江東西舟不入黃河河舟不入洛口而河陽柏崖太原永豐渭南諸倉節級轉運水通則舟行水淺則寓於倉以待斯舟無停留而物不耗失此甚利也元宗初不省二十一年耀卿為京兆尹京師雨水米踊貴元宗復問耀卿漕事耀卿條奏如前元宗

從之乃於河陰置河陰倉河東置柏崖倉三門東置  
集津倉西置鹽倉江淮漕皆輸河陰倉尋拜耀卿黃  
門侍郎同中書門下平章事兼江淮轉運使三歲漕  
輸倉者七百萬石省陸運傭錢三十萬緡

同上

肅宗末史朝義兵出宋州淮運阻絕河南尹劉晏為  
戶部侍郎兼勾當度支轉運使江淮粟帛由襄陽越

商於以輸京師

同上

代宗廣德二年廢勾當度支使以劉晏專領東都河

南淮西江南東西轉運凡漕事皆決於晏晏為歇隍  
支江船二千艘每船受千斛十船為綱每綱三百人  
篙工五十自揚州遣將部送至河陰上三門號上門  
填闕船米斗減錢九十調巴蜀襄漢麻枲竹篠為絢  
挽舟以朽索腐材代薪物無棄者未十年人習河險  
江船不入汴汴船不入河河船不入渭江南之運積  
揚州汴河之運積河陰河船之運積渭口渭船之運  
入太倉歲轉粟百一十萬石無升斗溺者及楊炎為

相以舊惡罷晏轉運使復歸度支而江淮米至渭橋  
寢減矣後李巽為諸道轉運乃復如晏之多

同上

貞元後漕河堙塞淮南節度使杜亞乃濬渠蜀岡疏  
句城湖愛敬坡起隄買城以通大舟河益庠水下走  
淮夏則舟不得前節度使李吉甫築平津堰以洩有  
餘防不足漕流遂通然漕益少江淮米至渭橋者才

二十萬斛

同上

文宗時戶部裴休為轉運使以河瀕縣令董漕事自



江達渭運米四十萬石居三歲米至渭橋百二十萬

石而國用足

同上

宋開寶五年率汴蔡兩河公私船運江淮米十萬石以給兵食八年分水陸發運江淮諸州擇部內高貲之民部送民多質魯不能檢御舟人舟人每有侵盜民破產不能償乃詔牙吏部送又復擾民汴河挽舟率

多飢凍

文獻通考

太平興國六年汴河歲運江淮米三百萬石菽一百

萬石非水旱蠲放民租未嘗不及其數

宋史

至道初江淮諸路租糴於真揚楚泗洲置轉般倉轉運使以江淮諸路綱輸倉載鹽以歸舟還其郡卒還其家汴州詣轉般倉運米輸京師皇祐中諸路因循糧綱法壞遂令汴綱至冬出江為諸路轉漕久之諸路綱不集嘉祐三年下詔切責有司以格詔不行預敕江淮等路轉運期以期年各造船補卒團本路綱五年詔汴船不得復出江至期諸路船猶不足汴船

既不至江外江船不得至京師而汴船工卒訖各坐  
食恒苦不足皆盜毀船材易錢自給船愈壞而漕額  
愈不及矣治平三年始詔汴船七十綱皆出江復故  
是年諸路卹漕船二千五百四十艘熙寧二年薛向  
為江淮等路發運使始募客船與官船分運互相檢  
察舊弊乃去歲漕常足三司使吳充言宜自明年減  
江淮漕米二百萬令發運司易輕貨二百萬緡計五  
年所得無慮千萬緡轉儲三路平糴備邊王安石謂

驟變米二百萬米必陡賤致輕貨二百萬貨必陡貴  
當令發運司度米貴州郡折錢變為輕貨儲之河東  
等路用常平法糶糴為便詔如安石議是歲江淮上  
供穀至京師者三分不及一元豐八年江淮等路發  
運副使蔣之奇奏開龜山運河漕運往來免風濤沉  
溺之患政和七年立東南六路州軍知州通判裝發  
上供糧斛任滿賞格自一萬石至四十萬石升名次  
減年天聖中罷轉般法廢真楚川堰干水牖自是東

南上供斛米并金帛茶布直抵京師號直達綱顧立法甚峻船有損壞所至修整不得踰時州縣欲其速過但令供狀以錢給之汭流鄉保悉致騷擾公私橫費百出又鹽法已壞迴舟無所得舟人逃散船亦隨壞本法盡廢

文獻通考

大觀三年詔停直達綱復轉般江淮米仍輸轉般倉政和二年復行直達綱毀拆轉般諸倉宣和五年江西轉運判官蕭序辰言轉般道里不遠人力不勞年

豐可以廣糴厚積以待中都之用自行直達道里既遠情弊尤多大江東西有終歲不能行一運者有押米萬石欠七八千石有拋失舟船兵稍逃散十不存一二者折欠之弊生於稽留而沿路官司多端阻節至有一路漕司不自置舟船截留他路回綱尤為不便詔發運司措置

宋史

高宗建炎二年詔江東西綱運輸平江府又詔江西亦許輸送江寧紹興初因地之宜以江西之粟餉淮

西理宗三十三年科撥諸路上供米江西吉信南安  
科撥建康江洪臨江興國南康科撥行在

續文獻通

考

元世祖用丞相伯顏之言由海運入京師分江東西糧  
為春秋二運至於京師者一歲多至三百餘萬石

同上

至元十五年始立京畿江淮都運司二仍各置分司  
以督綱運每歲入之江淮漕運司運糧至中灤京畿

漕運司自中漕運至大都

元史

至大四年始遣官至江浙議海運事令海船從揚子江逆流而上裝載糧米而江水湍急又多石磯走沙漲淺糧船俱壞歲歲有之

續文獻通考

順帝至元初翰林學士江西虞集上疏論東南運糧實竭民力今京師之東瀕海數千里北極遼海南瀕青齊海潮日至淤為沃壤宜用南人法築堤捍水為田聽富民欲耕者合其衆分以地官定其耕以萬夫



耕命為萬夫長以千夫耕命為千夫長三年而征其稅如是則京師糧足而海運可省矣時異議者多事

竟寢

同上

明成祖都燕百官衛士仰需東南於是始立運法派為二道一由江入海出直沽口由白河運至通州謂之海運一由江入淮黃河至陽武縣陸運至衛輝府由衛河運至薊州謂之河運永樂三年冬十月命江西造海運舟十三年會通河成遣平江伯陳瑄往江西

湖廣等處造船二千艘以從河運瑄建言造平底淺船甚稱便歲可運三百餘萬石至京師末年瑄復計議凡民運糧俱於淮安瓜洲補給腳價允與軍船出運又奏於瓜淮水次令軍民於此對船交兌軍船出給通關付還與民銷繳民補水腳與軍在淮安水次者每正糧一石外加五斗五升宣德二年令江西浙湖南直等處起運淮安徐州倉糧撥民自運赴通其運糧官軍於

淮安南京支運七年始立兌運法用吳亮言令江西

浙湖應天等處糧各官軍於附近水次領兌量地之

遠近費之多少定為加耗則例又給以輕齎銀兩

江西

每石加耗六斗六升又兩尖米一斗共七斗六升內除四斗隨船作耗餘米三斗六升折銀一錢八分名

三六以為洪牕盤剥之費許其附載貨物以為沿途

輕齎

食用謂之兌運景泰二年始置總督漕運都御史駐

淮安府成化十年又立改兌法先是江西應天等處

糧民上納淮徐臨德四倉官軍赴倉支領運送京通

二倉至是議抽支運米七十萬石改令官軍各赴彼  
水次交兌正德七年委戶部官分往江西浙湖等處  
地方監兌隆慶三年革監兌官萬厯五年仍差主事  
監兌六年停儲運四十四年海運成

續文獻通考

萬厯時海運從督漕王宗沐之請也後行之數年遇  
龍躍覆溺者多言者交擊之乃罷

安志

按唐漕江淮祖輸河陰宋漕東南之粟由江淮入  
汴固皆河運自元都燕乃舡海運蓋彼時朱清張

瑄皆海盜素習海事故元人用之稱便至明永樂  
初亦仍元制嗣後乃專藉河運議者謂河費不貲  
海運由浙西不旬日可達都下較之河運費省而  
功倍然嘗考元史至元二十八年海運漂米二十  
四萬五千六百有奇至大二年漂米二十萬九千  
六百有奇則語牽輓者海省而河費若計及漂溺  
又河安而海危也王者以天下為家損上益下亦  
奚恤此小費哉

江西通志卷二十八

欽定四庫全書

史部

江西通志卷二十九

詳校官監察御史<sub>臣</sub>左周

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>高 中

謄錄監生<sub>臣</sub>萬朝宗

欽定四庫全書

江西通志卷二十九

武事

八政範列五材天生有備無患誰能去兵江西要地  
山縱水橫厯徵往紀亦有戰爭

聖朝受命草澤廓清陸剽虎兕永翦蛟鯨奕奕厥武赫  
赫厥聲仁義介冑忠信千城士樂其業農安其耕兵  
氣永銷歌詠太平作武事志



周

景王九年

上且魯昭公六年

楚令尹子蕩帥師伐吳師於豫章

次於乾谿吳人敗其師於房鍾

春秋左氏傳

十六年

壬申魯昭公十三年

楚師還自徐吳人敗諸豫章獲其五

帥

同上

按豫章之名始見左傳杜預注云當在江北淮水

南蓋後徙在江南豫章孔穎達疏云五帥謂蕩侯

潘子司馬督囂尹午陵尹喜五人酈道元水經注

云潁水又北逕南昌縣城西於春秋屬楚即令尹子蕩師於豫章者也吳曾能改齊漫錄詳辯其誤

見沿革志

敬王二年

癸未魯昭公二十四年

楚子為舟師以略吳疆越大夫

胥犴勞王於豫章之汭王及圍陽而還吳人踵楚邊人不備遂滅巢及鍾離而還

同上

十二年

癸巳魯定公二年

秋楚人伐吳

春秋

左氏傳云楚囊瓦伐吳師於豫章吳人見舟於豫章

而潛師於巢冬十月吳軍楚師於豫章敗之遂圍巢  
克之獲楚公子繁

十四年

乙未魯定公四年

冬蔡侯吳子唐侯伐楚舍舟於淮汭

自豫章與楚夾漢左司馬戍謂子常曰子沿漢而與  
之上下我悉方城外以毀其舟還塞大隧直轅冥阯  
子濟漢伐之我自後擊之必大敗之既謀而行史皇  
謂子常楚人惡子而好司馬若司馬毀吳舟於淮塞  
城口而入是獨克吳也子必速戰乃濟漢而陳自小

別至於大別吳師大敗之五戰及郢

左傳

十五年

丙申楚昭王十二年

吳復伐楚取番楚恐去郢北徙都鄒

史記楚世家

括地志云饒州鄱陽縣春秋時為楚東境秦為番縣

屬九江郡

元王三年

丙寅魯哀公二十二年

冬十一月越滅吳

左傳

顯王三十五年

丁亥楚滅越

資治通鑑

史記越世家云當楚威王時越北伐齊齊威王使人

說越王遂釋齊而伐楚楚威王興兵伐之大敗越殺  
王無疆盡取故吳地

秦

始皇二十五年

已卯

王翦定荊江南地降越君

史記

江西大志云始皇二十四年王翦滅楚鹵負芻明年  
置九江郡南昌隸焉

按秦本紀鹵荆王事在二十三年分天下為三十  
六郡事在二十六年

二世帝二年

癸巳

鄱陽令吳芮使英布將其兵擊秦

通鑑綱目

漢書列傳云吳芮秦時鄱陽令也甚得江湖間民心號曰鄱君黥布六人也姓英氏布以論輸驪山驪山之徒數十萬人布皆與其長豪傑交通乃率其曹耦亡之江中為羣盜陳勝之起也布見鄱君其衆數千人鄱君以女妻之章邯滅陳勝破呂臣軍布引軍北擊秦左右校破之青波引兵而東

三年

甲午

沛公還攻胡陽遇鄱君別將梅鋗與皆降析酈

史記高  
祖本紀

漢

高帝五年

巳亥

布與劉賈入九江誘大司馬周殷殷反楚

遂舉九江兵與漢擊楚破垓下項籍死布遂剖符為

淮南王都六九江廬江衡山豫章郡皆屬焉

漢書英布傳

按史遷高祖本紀破項籍在五年布傳乃入六年

西江大志承其訛今正之

灌嬰傳云嬰渡江破吳郡長遂定吳豫章會稽郡

按郭子章豫章書云三年潁陰侯灌嬰渡江定豫  
章據嬰本傳三年所定者乃廣陵非豫章也爾時  
猶未封潁陰侯謝詔潁志云漢高帝六年潁陰侯  
灌嬰略定江南置豫章郡南粵尉陀數擾邊嬰將  
兵擊之據史記漢書列傳嬰定豫章在高祖未即  
帝位之先其為五年明矣且嬰定豫章後即還定  
淮北云擊尉陀事亦未合

十一年乙巳七月淮南王黥布反

高祖本紀



十二年

丙午

十月高祖已擊布軍會甄布走令別將追之

拜沛侯劉濞為吳王漢別將擊布軍洮水南北皆大

破之追得斬布鄱陽

同上

史記黥布傳云布之初反謂其將曰上厭兵必不能  
來使諸將獨畏淮陰彭越今皆已死餘不足畏也故  
遂反東擊荊荊王劉賈走死富陵盡劫其兵渡淮擊  
楚楚為三軍欲以相救為奇布破其一軍其二軍散  
走遂西與上兵遇斬西會甄布軍敗走布故與番君

婚長沙哀王

吳芮之子  
哀當作成

使人給布偽與亡誘走越故

信而隨之鄱陽鄱陽人殺布茲鄉民田舍

史記漢傳云立潁為吳王王三郡五十三城已拜受  
印高祖召潁相之謂曰若狀有反相因拊其背曰漢  
後五十年東南有亂者豈若耶然天下同姓為一家  
也慎無反潁頓首曰不敢

景帝三年

丁亥

春正月吳王潁反以周亞夫為太尉將兵

討之二月亞夫大破吳楚軍潁亡走越越人誅潁

通鑑

綱目

澤傳云晁錯說上曰吳王即山鑄錢煮海水為鹽誘天下亡人謀作亂今削之亦反不削之亦反削之其反亟禍小不削反遲禍大因削吳之豫章郡會稽郡吳王先起兵膠西誅漢吏二千石以下膠東菑川濟南楚趙亦然遂發兵西

武帝建元六年

丙午

閩粵擊南粵南粗守天子約不敢擅

發兵以聞上遣大行王恢出豫章大司農韓安國出

會稽兵未踰嶺閩粵王郢發兵距險其弟餘善與宗

族謀鏖殺王奉其頭致大行馳報天子詔罷兩將軍

兵

漢書閩粵王傳

按綱目事在六年秋八月豫章書作二年壬寅者

悞使鄱陽令唐蒙風曉南越本同時事郭亦悞載

元鼎五年

已

秋主爵都尉楊僕為樓船將軍出豫章下

橫浦

漢書南粵王傳

六年

庚午

冬漢破番禺樓船將軍僕上書願請引兵擊東

粵上以士卒勞倦不許罷兵令諸校留屯豫章梅嶺

待命

括地志云梅嶺在虔化縣東北一百二十八里

明年秋餘善發兵距漢

道號將軍駙力等為吞漢將軍入白沙武林梅嶺

索隱

曰今豫章北二百里接鄱陽界地名白沙有小水入湖沙東南八十里有武陽亭亭東南三十里地名武林此白沙武林當閩越之京道殺漢三校尉上遣梅將軍韓說出句

章浮海從東方往樓船將軍僕出武林中尉王溫舒

出梅嶺粵侯為戈船下瀨將軍出如邪白沙

漢書閩粵傳

新莽始建國元年

已

豫章太守賈萌起兵討莽不克死

之  
豫章書

按謝承後漢書云賈萌為豫章太守王莽篡漢舉  
兵誅莽不克而死是郭說所本也雷次宗豫章記  
云賈萌河東人漢更始二年為郡太守謀王莽師  
敗死即亡日顯靈於津立祠說小異矣水經注則  
云賈萌與安成侯張普爭地為普所害安成記及  
太平御覽皆從其說而班固漢書王莽傳云傳莽  
首詣更始懸宛市曹部監杜普陳定大尹沈意九

江連率賈萌皆守郡不降為漢兵所誅則萌死於  
更始建元以後萌實助莽謂討莽而死者事尤失  
實豫章始為立廟後廢而不血食固其宜也

天鳳四年

丁丑

羣盜起餘千人陳靖糾兵討之

饒州事考

後漢

光武帝建武元年

乙酉

汝陰王劉信

劉顯子

據豫章桂陽太

守張隆擊降之

豫章書

豫章書宗室傳云初信為更始討平汝南因封汝陰

王信遂將兵平定江南據豫章光武即位桂陽太守  
張隆擊破之信乃詣洛陽降以為汝陰侯

順帝陽嘉元年

壬申

春三月揚州六郡妖賊章何等寇四

十九縣殺傷長吏

後漢書順帝紀

晉書地理志云揚州統會稽丹陽吳豫章九江廬江

六郡

建康元年

甲申

秋八月揚徐盜賊范容周生等寇掠城邑

遣御史中丞馮緄督州郡兵討之

同上



沖帝秋九月揚州刺史尹耀九江太守鄧顯討賊范容等軍敗為賊所歿冬十一月九江盜賊徐鳳馬勉等稱無上將軍攻燒城邑十二月九江賊黃虎等攻合

肥

沖帝紀按沖帝於乙酉改元永嘉在位不滿五月

質帝永嘉元年

乙酉仍號

春三月九江賊馬勉稱皇帝九

江都尉滕撫討馬勉范容周生大破斬之秋七月廬

江盜賊攻尋陽滕撫遣司馬王章擊破之冬十一月

歷陽賊華孟自稱黑帝攻殺九江太守楊岑滕撫率

諸將擊孟等大破斬之

晉帝紀

按順帝建康以下數條皆豫章書所載故錄之但漢之九江郡所統十四城毫無涉於今之江右惟廬江盜賊攻尋陽一條據郡國志云尋陽南有九江東合為大江稍可傳會然漢之尋陽本在江北近蘄州界晉惠帝永興元年始分廬江之尋陽武昌之柴桑二縣置尋陽郡屬江州懷帝永嘉元年又以豫章之彭澤縣屬尋陽郡則郭書亦強載也

若江西大志以徐鳳馬勉亂事入建武年間舛錯尤甚

桓帝延熹五年

壬寅

秋八月艾縣賊焚燒長沙郡縣寇益

陽殺令

桓帝紀

按綱目書於五年之夏據帝紀在八月艾縣今之寧州武寧地春秋傳魯哀公二年吳公子慶忌出居於艾即此漢屬豫章郡

七年

甲辰

夏五月

據帝紀當在秋七月

荊州刺史度尚擊艾縣賊平

之通鑑綱目

度尚傳云延熹五年長沙零陵賊合七八千人自稱將軍遣御史中丞盛修募兵討之不能尅豫章艾縣六百餘人應募而不得賞直怨恚遂反焚燒長沙郡縣寇益陽欽縣令衆漸盛入遣謁者馬睦督荊州刺史劉度擊之軍敗睦度奔走尚書朱穆舉尚擢為荊州刺史尚躬率部曲與同勞逸廣募雜種諸蠻分明設購賞進擊大破之降者數萬人尚出兵三年羣寇

悉定七年封右鄉侯

獻帝初平四年

癸酉

春三月袁術殺揚州刺史陳溫

獻帝紀

興平元年

甲戌

秋九月以劉繇為揚州刺史

通鑑綱目

二年

乙亥

冬十二月孫策擊劉繇於曲阿破走之繇攻豫

章章窄融走死以華歆為豫章太守

同上

袁宏漢紀云劉繇將奔會稽許子將曰會稽富貴策

之所貪且窮在海隅不可生也不如豫章北連豫壤

西接荊州若收合吏民遣使貢獻與曹兗州相聞雖

有袁公路隔在其間其人豺狼不能久也足下受王命孟德景升必相救濟繇從之

吳書劉繇傳云繇奔丹徒遂泝江南保豫章駐彭澤  
笮融先至殺太守朱皓入居郡中繇討融為所破復  
招合屬縣攻破融融敗走入山為民所殺繇尋病卒

建安三年

戊寅

秋九月以孫策為討逆將軍封吳侯

通鑑

江表傳云太火慈從豫章還見策曰華子魚良德也  
然非籌略才丹陽僅芝自擅廬陵詐言被詔書為太

守鄱陽民帥別立宗部阻兵守界近自海昏有上繚  
壁五六千家相結聚作宗伍惟輸租布於郡耳發召  
一人遂不可得子魚亦覩視之而已策拊掌大笑乃  
有兼弁之志

四年

已未

冬十一月孫策徇豫章太守華歆降

同上

江表傳云廬江太守劉勳糧食少遣從弟偕告糴於  
豫章太守華歆歆郡素少穀遣使將偕就海昏上繚  
使諸宗帥共出三萬斛米與偕偕乃報勳使來襲取

之勲得偕書潛軍到海昏宗帥空壁逃匿了無所得  
時策西討黃祖行及石城聞勲輕身詣海昏分遣從  
兄資輔率八千人於彭澤待勲自與周瑜率二萬人  
步襲皖城即克之輔又於彭澤破勲勲與偕北歸曹  
公策討黃祖旋軍欲過取豫章使虞翻徑到郡謂歆  
曰討逆將軍智略超世用兵如神今欲守孤城自料  
資糧已知不足不早為計悔無及也今大軍已至檄  
卿明日日中迎檄不到者與君辭矣翻既去歆明旦



出城遣吏迎策策既定豫章引軍還吳

吳書孫討逆傳云以孫賁為豫章太守分豫章為廬陵郡以賁弟輔為廬陵太守

通鑑紀事云會僮芝病輔遂進取廬陵留周瑜鎮巴邱

按豫章書載是年周瑜鎮巴邱引裴松之云孫策於時始得豫章廬陵尚未能定江夏瑜之所鎮應在今巴邱縣也與後所屯巴邱不同又引晉地理

志謂廬陵郡有巴邱縣今撫州崇仁縣即其地梁  
吹巴邱曰巴山然考瑜本傳先已為江夏太守矣  
巴邱之不屬廬陵明甚蓋吳之巴邱即今岳州巴  
陵地在漢為長沙郡下雋縣也

五年

庚辰

夏四月孫策卒弟權代領其衆

通鑑綱目

八年權西伐黃祖破其舟軍雒城未克山寇復動還過

豫章使呂範平鄱陽程普討樂安太史慈領海昏

吳書

吳主傳

呂範傳云征江夏還定鄱陽策薨奔喪於吳後權復征江夏範與張昭留守曹公至赤壁與周瑜等俱拒破之拜裨將軍領彭澤太守以彭澤柴桑厯陽為奉

邑

據傳則範平鄱陽在孫策時八年鄱陽復叛討平者亦非範也

程普傳云從征江夏還過豫章別討樂安樂安平定

代太史慈備海昏

代慈事在十一年後

太史慈傳云劉表從子磐驍勇數為寇於艾西安諸縣策於是分海昏建昌左右六縣以慈為建昌都尉

治海昏並督諸將拒磐磐絕迹不復為寇孫權統事  
以慈能制磐遂安南方之事建安十一年卒

十年

乙酉

權使賀齊討上饒分為建平縣

吳主傳

賀齊傳云八年齊軍討漢興經餘汗以為賊衆兵少  
深入無繼恐為所斷令楊松長丁蕃留備餘汗蕃本  
與齊鄰城恥見部伍辭不肯留齊乃斬蕃於是軍中  
震慄無不用命十年轉討上饒分以為建平縣

十三年

戊子

周瑜破曹操於赤壁使程普駐兵瑞昌忽有

羣鳥飛集軍中以為佳祥已而得捷遂名赤鳥鎮江

兵防

志

十五年庚寅分豫章為鄱陽郡

吳主傳

步騭傳云建安十五年出領鄱陽太守

十八年癸巳豫章東部民彭材李王王海等起為賊眾萬

餘人賀齊討平之誅其首惡餘皆降揀其精健為兵

次為縣戶遷奮武將軍

吳書賀齊傳

十九年甲午閏五月權拜呂蒙為廬江太守還屯尋陽

通鑑

綱目

呂蒙傳云蒙還尋陽未期廬陵賊起諸將討擊不能禽權曰鷙鳥累百不如一鶚復令蒙討之蒙至討其首惡餘皆釋放復為平民

二十一年

丙申

鄱陽民尤突受曹公印綬化民為賊賀齊

與陸遜討破突斬首數十餘黨震服

吳書賀齊傳

二十四年

己亥

冬十二月以孫權為票騎將軍領荊州牧

封南昌侯

通鑑

三國

蜀漢昭烈帝章武元年

辛丑

八月孫權遣使降魏

建安二十五年

冬十月魏王曹丕稱皇帝改元  
黃初二年廢獻帝為山陽公

魏封權為吳王

通鑑綱目

二年

壬寅

冬十月吳王權改元黃武十一月魏主丕自將

擊之

同上

漢後王建興四年

丙午吳黃武五年

十二月吳鄱陽賊彭綺反

同上

五年

丁未吳黃武六年

春正月吳討彭綺禽之

同上

周魴傳云黃武中鄱陽大帥彭綺作亂攻沒屬城乃以魴為鄱陽太守與胡綜戮力致討遂生擒綺送詣

武昌又云賊帥董嗣負阻劫鈔豫章臨川並受其害

裴松之云孫亮太平二年始立臨川郡是時未有臨川吾策唐資嘗以三千兵

攻守連月不能拔魴表乞罷兵得以便宜從事遣間

諜授以方略誘狙殺嗣嗣弟怖懼詣武昌降於陸遜

乞出平地自改為善由是數郡無復憂惕

七年

已酉吳黃龍元年

夏四月吳王孫權稱皇帝

同上



十二年

甲寅吳嘉禾三年

冬十一月廬陵賊李桓等為亂

吳主傳

十三年

乙卯吳嘉禾四年

夏遣呂岱討李桓等

同上

呂岱傳云廬陵賊李桓路合會稽東冶賊隨春南海

賊羅厲等一時並起權詔岱督劉纂唐資等分部討

擊春即時首降岱拜春偏將軍使領其衆桓厲等皆

見斬獲

按吳主傳中郎將吾榮獲李桓事在嘉禾五年

傳首詣都

十四年

丙辰吳嘉禾五年

冬十月鄱陽賊彭旦等為亂

同上

十五年

丁巳吳嘉禾六年

春二月陸遜討彭旦等其年皆破之

同上

陸遜傳云嘉禾六年中郎將周祗乞於鄱陽召募事  
下問遜以為此郡民易動難安不可興召恐致賊寇  
祗固陳取之郡民吳遽等果作賊殺祗攻沒諸縣豫  
章廬陵宿惡民並應遽為寇遜自聞輒討即破遽等  
相率降料得精兵八千餘人

按大志載周祗事始末不詳并缺年分饒州事考  
悞入建安十五年皆由未觀陸遜傳也

延熙元年

戊午吳赤烏元年

夏呂岱討廬陵賊畢還陸口

同上

二年

己未吳赤烏二年

冬十月吳將周脩有罪

瑜子封都鄉侯時將兵千人屯

公安

廢徙廬陵

通鑑綱目

六年

癸亥吳赤烏六年

冬十二月司馬懿率軍入舒諸葛恪自

皖遷於柴桑

吳主傳

十五年

壬申吳主亮建興元年

夏四月吳徙其齊王奮於豫章

通鑑

綱目

二十年

丁丑吳太平二年

春二月以豫章東部為臨川郡秋八

月鄱陽民為亂廷尉丁密步兵校尉鄭胄將軍鍾離

牧率軍討之

孫亮傳

鍾離牧傳云建安鄱陽新都三郡山民作亂出牧為  
監軍使者討平之賊帥黃亂常俱等出其部伍以充  
兵役牧封秦亭侯拜越騎校尉

吳永安七年

甲申蜀漢已亡魏咸熙元年八月孫皓立改元興

秋七月廬陵豫

章民張節等為亂衆萬餘人

孫休傳

晉

武帝泰始三年

丁亥吳寶鼎二年

冬十二月皓分豫章廬陵長

沙為安成郡

孫皓傳

九年

癸巳吳鳳二年

豫章太守張俊修豫章城

豫章書

咸寧五年

己亥吳天紀三年

冬十一月晉大舉兵分道伐吳

通鑑

綱目

晉書武帝紀云遣安東將軍王渾出江西

按方輿紀要王渾出橫江在今和州東南二十五

里即大江也與今之江西無涉

太康元年

庚子

春三月吳主皓降晉吳亡冬十月改廬陵

南部為南康郡

豫章書

武帝紀云孫皓面縛輿櫬降於軍門王濬送京師收

其圖籍克州四郡四十三縣三百一十三

八年

丁未

冬十月南康平固縣吏李豐反聚眾攻郡縣自

號將軍捕討伏誅

武帝紀

惠帝元康元年

辛亥

秋七月分揚州荊州十郡為江州

惠帝

紀

太安二年

癸亥

秋七月劉弘遣陶侃討張昌昌走衆降

通鑑

綱目

惠帝紀云夏五月義陽蠻張昌舉兵反以山都人邱  
沉為主改姓劉氏偽號漢建元神鳳六月遣荊州刺  
史劉弘等討張昌於方城敗績秋七月昌陷江南諸  
郡豫章太守閻濟等遇害昌別帥石冰寇揚州刺史  
陳徽與戰大敗諸郡盡沒八月劉弘及張昌戰於清  
水斬之冬十一月征東將軍劉準遣廣陵度支陳敏

擊水

永興二年

乙丑

冬十二月陳敏據江東劉弘遣江夏太守

陶侃將兵討破之

同上

惠帝紀云右將軍陳敏反自號楚公逐揚州刺史劉  
機遣弟恢南略江州

陳敏傳云敏弟昶知顧榮等有貳心勸敏殺之不從  
昶將精兵據烏江弟恢率錢端等南寇江州弟斌東  
略諸郡遂據有吳越之地



懷帝永嘉元年

丁卯

春三月陳敏將顧榮周玘殺敏以降

同上

懷帝紀云七月以平東將軍琅瑯王睿為安東將軍

都督揚州江南諸軍事

五年

辛未

夏五月杜弢陷長沙六月琅瑯王睿遣兵擊江

州刺史華軼斬之

同上

杜弢傳云弢自稱平難將軍湘州刺史攻破郡縣刺史苟眺委城走眺之走也州人推安成太守郭察領

州事因率衆討弒反為所敗察死之

華軼傳云洛郡不守司空荀藩移檄以帝為盟主承制改易長吏軼不從命於是遣左將軍王敦都督甘卓周訪宋典趙誘等討之軼遣別駕陳雄屯彭澤以拒敦自率舟師為援武昌太守馮逸次於湓口訪擊逸破之前江州刺史衛展不為軼所禮與豫章太守周廣為內應潛軍襲軼軼衆潰奔於安成追斬之及其五子傳首建鄴

愍帝建興元年

癸酉

夏五月陶侃破走杜弢

同上

陶侃傳云時周顗為荊州刺史先鎮潯水城

一統志云潯水

城在九江府城西十五里木渚漢潯陽縣

賊掠其良口侃使部將朱伺救

之賊退保冷口侃謂諸將曰此賊必更步向武昌吾宜還城賊果增兵來攻侃使朱伺等逆擊大破之

三年

乙亥

春二月杜弢別將杜弘張彥與臨川內史謝攜

戰于海昏攜敗績死之三月豫章內史周訪擊杜弘走之斬張彥於陣秋八月荊州刺史陶侃攻杜弢弢

敗走道死

愍帝紀

周訪傳云命訪與諸軍共征杜弢弢作桔槔打官軍  
船艦訪作長岐棧以距之桔槔不得為害而賊從青  
草湖窰抄官軍又遣其將張彥陷豫章王敦時鎮湓  
口遣督護繆弢李恒受訪節度共擊彥弢於豫章石  
頭與彥戰彥軍退走訪率帳下將李午等追彥破之臨  
陣斬彥時訪為流矢所折前兩齒形色不變及暮訪  
與賊隔水賊衆數倍自知力不能敵夜令軍中多布

火而食賊謂官軍益至未曉而退訪促渡水北斷橋  
訖賊復至隔水不得進遂歸湘州訪復以舟師造湘  
城軍達富口而弑遣杜弘出海昏時湓口騷動訪步  
上柴桑偷渡與賊戰斬首數百賊退保廬陵訪追擊  
敗之賊嬰城自守訪復圍廬陵弘大擲寶物於城外  
軍人競拾之弘因陣亂突圍而出率軍追之獲鞍馬  
鎧仗不可勝數弘入南康太守將兵逆擊又破之奔  
於臨賀進訪為龍驤將軍王敦表為豫章太守加征

討都督賜爵尋陽侯

王敦傳云侃之滅弒也敦以元帥進鎮東大將軍開  
府儀同三司加都督江揚荆湘交廣六州諸軍事江  
州刺史封漢安侯敦始自選置兼統州郡焉頃之杜  
弒將杜弘南走廣州求討桂林賊自效敦許之陶侃  
距弘不得進乃詣零陵太守尹奉降奉送弘與敦用  
為將遂見寵待南康人何欽所居嶮固聚黨數千人  
敦就加四品將軍於是專擅之迹漸彰矣

元帝建武元年

丁丑

秋七月杜曾攻陷楊口豫章太守周

訪討破之

通鑑綱目

周訪傳云杜曾逐王廙徑造沔口元帝命訪擊之訪有衆八千進至沌陽使將軍李恒督左甄許朝督右甄自領中軍令曰一甄敗鳴三鼓兩甄敗鳴六鼓自旦至申兩甄皆敗訪選精銳八百人自行酒飲之勅不得妄動聞鼓音乃進賊未至三十步訪親鳴鼓將士皆騰躍奔赴曾遂大潰殺千餘人訪夜追之諸將

請待明日訪曰曾驍勇能戰何之敗也彼勞我逸是以尅之宜及其衰乘之可滅曾遁走訪部將蘇溫收

曾諸軍

按帝紀訪斬曾在大興二年

大興元年

戊寅

春三月即皇帝位夏四月加大將軍王敦

江州牧

元帝紀

永昌元年

壬午

春正月大將軍王敦舉兵武昌以誅劉隗

為名三月遣平南將軍陶侃領江州安南將軍甘卓

領荊州各帥所統以躡敦後

同上



明帝太寧元年

癸未

冬十一月王敦以其兄征南大將軍

含為征東大將軍都督揚州江西諸軍事以軍國饑

乏調刺史以下米各有差

明帝紀

二年

甲申

夏六月尋陽太守周光舉兵應王敦秋七月敦

死光斬錢鳳詣闕自贖

豫章書

周光傳云敦以光為寧遠將軍尋陽太守及敦舉兵  
光率千餘人赴之既至敦已死光未之知求見敦王  
應祕不言以疾告光退曰我遠來而不見公其死乎

遽見其兄撫曰王公已死何為與錢鳳作賊衆並愕  
然其夕衆散錢鳳走出至闔廬洲光捕鳳詣闕贖罪  
故得不廢

成帝咸和元年

西成

秋八月以溫嶠為平南將軍假節都

督江州刺史

成帝紀

溫嶠傳云咸和初代應詹為江州刺史持節都督平  
南將軍陳豫章十郡之要宜以刺史居之尋陽濱江  
都督應鎮其地

時嶠鎮武昌

今以州帖府進退不便且古

鎮將多不領州皆以文武形勢不同故也宜選單車  
刺史別撫豫章專理黎庶詔不許

三年

戊子

春正月溫嶠以兵赴難至尋陽二月庾亮奔尋

陽蘇峻兵犯闕夏五月嶠以陶侃入討峻

通鑑綱目

嶠傳云蘇峻反嶠屯尋陽遣督護王愨期西陽太守  
鄧嶽鄱陽內史紀瞻等率舟師赴難及京師傾覆嶠  
聞之號慟俄而庾亮來奔宣太后詔進嶠驃騎將軍  
開府儀同三司嶠曰今日之急殄寇為先未效勲庸

而遂受榮寵非所聞也固辭不受亮雖奔敗嶠每推  
崇之分兵給亮遣王愷期等要侃同赴國難侃恨不  
受顧命不許嶠用其部將毛寶說復固請侃許之遣  
督護龔登率兵詣嶠嶠於是列上尚書陳峻罪狀有  
衆七千灑泣登舟移告四方征鎮時侃雖許自下而  
未發復追其督護龔登嶠重與書由是侃激厲遂率  
所統與嶠亮同赴京師戎卒六萬旌旗七百餘里  
毛寶傳云祖約遣祖煥桓撫等欲襲濫口陶侃將自

擊之寶曰義軍恃公公不可動寶請討之乃使寶行  
先是桓宣背約南屯馬頭山為煥撫所攻求救於寶  
寶兵少器仗濫惡為煥撫所敗中箭貫髀徹鞍使人  
跣鞍拔箭血流滿鞞夜還救宣至宣營而煥撫退

四年

己丑

冬十二月右將軍郭默害平南將軍江州刺史

劉脩太尉陶侃帥衆討默

成帝紀

劉脩傳云蘇峻作亂濫嶠率衆而下留脩等守湓口  
事平代嶠為平南將軍都督江州諸軍事領江州刺

史假節屑位任轉高矜豪日甚縱酒耽樂不恤政事  
大殖財貨是時朝廷空罄百官無祿惟資江州運漕  
而屑商旅繼路以私廢公有司奏免屑官書始下為  
郭默所害

五年

庚寅

夏五月

綱目作正月疑誤

疑誤

太尉陶侃擒郭默於尋陽斬

之

同上

侃傳云發使上表討默與王導書曰郭默殺方州即  
用為方州害宰相便為宰相乎導答曰默居上流之

勢如有船艦成資故苞含隱忍使其有地一月潛嚴足下軍到是以得風發相赴豈非遵養時晦以定大事者耶侃省書笑曰是乃遵養時賊也侃既至默將宗侯縛默父子五人及張丑詣降侃斬默等詔侃都督江州領刺史

咸康六年

庚子

春正月以庾翼都督江荆等軍州事

通鑑綱目

庾翼傳云翼以帝舅年少超居大任遐邇屬目慮其不稱翼戎政嚴明經略深遠數年之中公私充實人

情翕然稱其才幹

康帝建元元年

癸卯

冬十月以車騎將軍庾冰都督荆江

司雍益梁六州諸軍事江州刺史

康帝紀

庾冰傳云弟翼當伐石季龍於是以本號除都督諸

州軍事領江州刺史

二年

甲辰

冬十一月

據帝紀

庾冰卒詔翼復督江州翼繕修

軍器大佃積穀以圖後舉

通鑑綱目

穆帝永和元年

乙巳

秋七月持節都督江州刺史庾翼卒



翼傳云子方之爰之為桓溫所廢並遷徙於豫章

四年

戊申

冬十二月豫章人黃韜聚衆數千寇臨川太守

庾條討平之

同上

庾條傳云為冠軍將軍臨川太守豫章黃韜自稱孝  
神皇帝臨川人李嵩為相聚黨數百人乘犢車衣皂  
袍攻郡縣條討平之

哀帝興寧元年

癸亥

冬十一月張駿殺江州督護趙毘以

叛江州刺史桓沖討斬之

哀帝紀

桓沖傳云溫破姚襄獲襄將張駿楊凝等徙於尋陽  
沖在江陵未及之任而駿率其徒五百人殺江州督  
護趙毘掠武昌府庫將妻子北叛沖遣將討獲之

孝武帝寧康元年

癸酉

秋七月以桓沖都督揚豫江州軍

事

通鑑綱目

沖傳云沖既代溫居任盡忠王室或勸誅除時望沖  
不從

太元十年

西

秋七月秦太子宏來奔處之江州

同上

安帝隆安二年

戊戌

春二月以王愉都督江豫州軍事秋

七月王恭殷仲堪及南郡公桓元舉兵反八月楊佺期及元奄至湓口王愉奔臨川元追獲之九月恭司馬劉牢之執恭以降斬之以桓元為江州刺史

同上

殷仲堪傳云使楊佺期以舟師五千為前鋒桓元次之仲堪率兵二萬相繼而下佺期元至湓口王愉奔臨川元遣偏軍追獲之聞劉牢之反恭乃迴師屯蔡

洲元從兄脩告會稽王道子曰若許佺期以重利無  
不倒戈於仲堪者道子納之乃以元為江州佺期為  
雍州黜仲堪為廣州仲堪恚被貶退使徇於軍曰若  
不各散而歸大軍至江陵當悉戮餘口仲堪將劉系  
先領二千人隸佺期率眾而歸元等大懼追仲堪至  
尋陽及之遂於尋陽結盟元為盟主臨壇歃血並不  
受詔申理王恭求誅劉牢之譙王尚之等朝廷深憚  
之詔仲堪還復本位

四年

庚子

春三月詔桓元都督荊江八州軍事荊江州刺

史

同上

桓元傳云表求領江荆二州詔以元都督荆襄雍秦

梁益寧七州後將軍荊州刺史假節以桓脩為江州

刺史元上疏固爭江州於是進督八州復領江州刺

史樹用腹心兵馬日盛屢上疏求討孫恩外託勤王

實欲觀釁而進以桓偉為江州鎮夏口遣桓振皇甫

敷馮該等戍湓口

桓偉為江州綱目事在五年

元興元年

壬寅

春正月以後將軍元顯為驃騎大將軍征

討大都督鎮北將軍劉牢之為前鋒前將軍譙王尚  
之為後部以討桓元二月遣兼侍中齊王柔之以駟

虞幡宣告荆江二州三月劉牢之叛降王師敗績元

顯遇害

安帝紀

二年

癸卯

冬十二月桓元篡位以帝為平固王

縣名屬南康郡今隸

贛州蒙塵於尋陽

同上

三年

甲辰

春三月桓元至尋陽逼帝西上劉毅等率兵追

之夏四月何無忌等及元兵戰於桑落洲

江州圖經  
九江始於

鄂陵終  
於桑落

大破之五月桓誅帝復位

通鑑綱目

劉毅傳云桓元既西走劉裕以毅為冠軍將軍與何無忌劉道規躡元元衆大潰燒輜重夜走元將郭銓劉雅等襲陷尋陽毅遣武威將軍劉懷肅討平之後桓振桓謙復聚衆毅為振所敗退次尋陽坐免官尋原之毅復與道規發尋陽桓亮自號江州刺史遣劉敬宣擊走之

何無忌傳云武陵王遵承制以無忌為輔國將軍以  
會稽王道子所部精兵悉配之南追桓元與振武將  
軍劉道規俱受冠軍將軍劉毅節度元留其龍驤將  
軍何澹之前將軍郭銓江州刺史郭昶之守湓口無  
忌等次桑落洲澹之等率軍來戰澹之常所乘舫旌  
旗甚盛無忌謂道規曰今衆寡不敵戰無全勝澹之  
雖不居此舫取則易獲因縱兵騰之可一鼓而敗也  
道規從之遂獲賊舫因傳呼曰已得何澹之矣賊中



驚擾道規乘勝徑進無忌入鼓譟赴之澹之潰進據  
尋陽

義熙元年

乙巳

春正月劉毅等擊破馮該於豫章口夏五

月劉毅何無忌討滅桓元餘黨荆湘江豫皆平

同上

按劉毅傳云毅率無忌道規等諸軍破馮該於豫  
章口推鋒而進遂入江陵附錄此條見春秋傳所  
云豫章去江陵甚近也

六年

庚戌

春二月盧循寇南康廬陵豫章陷之三月江荆

都督何無忌討徐道覆戰敗死之夏五月豫州都督  
劉毅及盧循戰於桑落洲敗績秋七月盧循退還尋  
陽劉裕遣兵追之冬十二月劉裕及盧循戰於左里  
大破之循及道覆南走裕遣將軍劉藩等追之

同上

通鑑紀事云初徐道覆使人伐船材於南康山至始  
興賤賣之船材大積而人不疑至是悉取以裝艦旬  
日而辦盧循自始興寇長沙道覆寇南康廬陵豫章  
諸守相皆委任奔走道覆順流而下安成公何無忌

自尋陽引兵拒盧循長史鄧潛之諫曰循兵艦大盛  
勢居上流宜決南塘守城以待之彼必不敢捨我遠  
下俟其疲老然後擊之參軍殷闡曰循所將皆三吳  
舊賊百戰餘勇始興溪子拳捷善鬪宜留屯豫章徵  
兵屬城兵至合戰未晚也無忌不聽與徐道覆遇於  
豫章賊令彊弩數百登西岸小山邀射之西風暴急  
飄無忌所乘小艦向東岸賊以大艦逼之衆遂奔潰  
無忌厲聲曰取我蘇武節來賊衆雲集握節而死劉

穀聞循入寇將拒之而疾作既瘳將行劉裕遺書曰  
賊新獲利其鋒不可輕今脩船垂畢當與弟同舉又  
遣劉藩諭止之穀怒投書於地帥舟師二萬發姑熟  
與循戰於桑落洲大敗棄船以數百人步走初循至  
尋陽聞裕已還猶不信既破穀乃得審問與其黨相  
視失色循欲退還尋陽攻取江陵據二州以抗朝廷  
道覆謂宜乘勝徑進固爭之循猶豫累日乃從之秋  
七月循自蔡洲南還尋陽裕使輔國將軍王仲德等

帥衆追循江州刺史庾悅以鄱陽太守虞邱進為前  
驅屢破循兵進據豫章絕循糧道道覆帥衆三萬趣  
江陵劉道規使劉遵別為遊軍自拒道覆於豫章口  
前驅失利遵自外橫擊大破之斬首萬餘級赴水死  
者殆盡道覆單舸走還湓口裕軍雷池循道覆帥衆  
數萬塞江而下裕以勁弩射循軍循艦泊西岸岸上  
軍投火焚之循兵大敗走還尋陽將趣豫章乃悉力  
柵斷左里裕軍至不得進將戰所執麾竿折幡沉於

水衆並恠懼裕咲曰往年覆舟之戰幡竿亦折今者復然賊必破矣即攻柵而進循兵雖殊死戰弗能禁循單舸走所殺及投水死者萬餘人納其降附宥其逼略遣劉藩孟懷玉輕軍追之

七年

辛亥

夏四月詔劉毅兼督江州軍事

同上

毅傳云轉衛將軍開府儀同三司江州都督毅上表謂宜解軍府移鎮豫章處十郡之中屬簡惠之政以及數年可有生氣尋陽接蠻可即州府千兵以助郡

成於是解江州刺史庾悅毅移鎮豫章遣其親將趙  
恢領千兵守尋陽

十二年

丙辰

春正月太尉劉裕自加都督二十二州軍事

通鑑  
綱目

按張九韶云東晉以來南北分爭州郡不常迨宋  
受晉禪有州二十二其八曰江州治尋陽

宋

文帝元嘉三年

丙寅

夏五月以檀道濟為征南大將軍開

府儀同三司江州刺史

南史文帝紀

十年

癸酉

冬十一月宋謝靈運有罪誅

通鑑綱目

謝靈運傳云文帝以為臨川內史在郡遊放不異永嘉為有司所糾遣使隨州從事鄭望生收靈運靈運興兵叛逸為詩曰韓亡子房奮秦帝魯連恥本自江海人忠義感君子追討擒之送廷尉論正斬刑上愛其才降死徙廣州後棄市

十三年

丙子

春三月殺江州刺史永修公

永修縣漢中平立

檀道



濟

豫章書

十七年

庚辰

冬十月以彭城王義康為江州刺史蕭斌為

詔議叅軍領豫章太守使將軍蕭承之將兵防守

通鑑

綱目

二十二年

乙酉

冬十二月廢義康為庶人徙安成郡以沈

邵為安成相領兵防守

同上

二十四年

丁亥

冬十月胡誕世據豫章反

同上

胡藩傳云藩第十六子誕世欲奉庶人義康交州刺

史檀和之至豫章討平之

三十年

癸巳

夏四月江州刺史武陵王駿舉兵討逆劬宋

人立駿

同上

沈慶之傳云元凶弒逆孝武遣慶之引諸軍慶之曰  
蕭斌婦人不足數其餘將帥並易與耳今輔順討逆  
不憂不濟也孝武至尋陽慶之及柳元景等並勸即  
大位

孝武帝孝建元年

甲午

春二月江州刺史臧質以南郡王

義宣舉兵反夏宋主遣兵討質誅之

同上

臧質傳云質自謂人才足為一世英傑始開國禍便有異圖以義宣凡闇易制欲外相推奉以成其志孝武遣撫軍將軍柳元景統王元謨等屯梁山洲築壘待之義宣遣腹心劉湛之就質陳軍城南元謨悉精兵出戰薛安都騎軍前出垣護之督諸將繼之乃大潰質走至尋陽焚府舍載妓妾入南湖摘蓮噉之追兵至以荷覆頭沈於水出鼻軍士鄭俱兒望見射之

中心兵刃亂至腹冒纏紫水草隊主裴應斬質傳首  
建業

明帝泰始元年

乙巳

冬十一月江州刺史晉安王子勛舉

兵尋陽

同上

子勛傳云大明七年為江州刺史加都督八年改授  
雍州未拜而孝武崩還為江州廢帝誅何邁使八座  
奏子勛與邁通謀遣朱景送藥賜死景至湓口長史  
鄧琬等奉子勛起兵以廢立為名明帝定亂進子勛

車騎將軍開府儀同三司琬等不受命

宋書鄧琬傳云安成太守劉襲舉郡奉順琬遣龍驤將軍廖瑛率數千人并發廬陵白丁攻襲襲與郡丞檀玠拒戰玠臨陣見殺襲棄郡走瑛鹵掠而退襲復出據郡時齊王率衆東北征討世子蹟為南康贛令琬遣使收世子蕭欣祖桓康等奉世子長子奔竄草澤募得數百人攻郡出世子世子自號寧朔將軍與南康相沈用之等據郡起義琬徵始興相殷孚為御

史中丞并令率郡人俱下孚衆盛世子避之揭陽山  
琬遣戴凱之為南康相世子率衆攻之凱之敗走世  
子遣幢主檀文起千人戍西昌與龔相應琬人遣廖  
琰與其中兵參軍胡昭等築壘西昌堅壁相守琬召  
豫章太守劉衍以為右將軍中護軍殷孚代為豫章  
太守督上流五郡以防龔等孚既去始興以郡五官  
掾譚伯初留知郡事士人劉嗣祖等斬伯初據郡琬  
遣始興太守韋希真鷹揚將軍楊弘之領衆一千討

嗣祖嗣祖亦遣衆出南康與齊王世子合希真等以  
義徒彊盛住廬陵不敢進

二年

丙午

春正月遣建安王休仁討江州晉安王子勛遂

稱帝三月沈攸之代將擊尋陽軍大破之八月宋臺

軍克江州殺子勛

同上

子勛傳云即僞位於尋陽年號義嘉備置百官四方  
響應是歲四方貢計並詣尋陽及軍敗子勛見殺時  
年十一

沈攸之傳云殷孝祖為前鋒都督失人情攸之內撫將士外諧羣帥衆並安之時孝祖中流矢死建安王休仁也虎檻總統衆軍聞孝祖死遣寧朔將軍江方興龍驤將軍劉靈各率三千人赴赭圻攸之乃率諸軍主詣方興推重并慰勉之明旦進戰自寅訖午大敗賊尋進號輔國將軍代孝祖督前鋒諸軍事攸之進平尋陽遷中領軍

鄧琬傳云琬惶擾無計時張悅稱疾呼琬計事令左



右伏甲琬至謀斬晉安王封府庫以謝罪悅曰寧可  
賣殿下求活邪因呼酒第二子詢提刀出餘人續至  
即斬琬齎首詣建安王休仁降

宋主昱元徽二年

甲寅

夏五月江州刺史桂陽王休範舉

兵反攻建康右衛將軍蕭道成擊斬之六月荊州刺

史沈攸之等攻江州克之

同上

休範傳云發自尋陽晝夜取道大雷戍主杜道欣馳  
下告變朝廷震動齊高帝出次新亭壘屯騎校尉黃

回偽降休範置之左右回與越騎校尉張敬兒直前  
斬休範首持還左右並散晉熙王燮自夏口遣軍平  
尋陽

攸之傳云休範舉兵襲都攸之謂僚佐曰桂陽今逼  
朝廷必聲言吾與之同若不顛沛勤王必增朝廷之  
惑於是遣使受郢州刺史晉熙王燮節度會休範平  
使乃還

順帝昇明元年

丁巳即元徽五年  
於七月始改

秋七月宋中領軍蕭道

成弑其主昱而立安成王準冬十一月沈攸之舉兵

討蕭道成

同上

豫章書云初道成以世子蹟為晉熙王變長史行郢州事修治器械以備攸之及徵蹟為左衛將軍乃薦司馬柳世隆自代攸之起兵蹟行至尋陽衆欲倍道趨建康蹟曰尋陽地居中流密邇畿甸若留屯湓口內藩朝廷外援夏口依據形勝控制西南今日會此天所置也或以為湓口城小難固左中郎將周山圖

曰今據中流為西方勢援不可以小事難之苟衆心  
齊一江山皆城隍也蹟乃奉變鎮湓口山圖斷取行  
旅船板以造樓櫓立水柵旬日皆辦道成聞之喜曰  
蹟真我子也以蹟為西討都督蹟啟山圖為軍副時  
江州刺史邵陵王友鎮尋陽蹟以為尋陽城不足固  
表移友同鎮湓口留江州別駕豫章胡諧之守尋陽  
按沈約宋書以攸之為反叛綱目獨書討者蓋其  
心雖未必純忠於宋而師出不為無名也明年攸

之軍潰走死蕭齊代宋之勢遂成矣

齊

武帝永明三年

丑

春正月以大司農劉楷為交州刺史

發南康廬陵兵討李叔獻

叔獻本交州刺史既受命而斷割外國貢獻故討之

叔獻懼為楷襲間道自湘州還朝

通鑑

十一年

癸酉

春正月以陳顯達為江州刺史

通鑑綱目

海陵王延興元年

甲戌即鬱林王隆昌元年及明帝建武元年也

秋九月宣城

公鷟殺鄱陽王錡等七人

同上

晉安王子懋傳云子懋鎮尋陽延興元年聞鄱陽隨

邵隆

子二王見殺欲起兵與叅軍周英防閤陸超之議

事成則宗廟獲安不成猶為義鬼董僧慧曰此州雖  
小孝武亦嘗用之今以勤王之師橫長江指北闕以  
請鬱林之罪誰能對之母阮在都遣書欲密迎上阮  
報同產弟子瑤之為計瑤之馳告明帝遣中護軍王  
元邈平西將軍王廣之南北討使軍主裴叔業與瑤  
之先襲尋陽子懋先已具船於稽亭渚聞叔業得溫

城乃據州自衛子懋部曲多雍土人皆踴躍願奮叔業畏之遣子瑤之說子懋曰今還都必無過憂政當作散官不失富貴也子懋既不出兵衆情稍阻中兵叅軍于琳之瑤之兄也說子懋賂叔業使琳之往因說叔業取子懋叔業遣軍主徐元慶將四百人隨琳之入城子懋笑謂之曰不意渭陽翻成梟獍琳之以袖障面使人害之

東昏侯永元元年

己卯

冬十一月太尉江州刺史陳顯達

舉兵反於尋陽加護軍將軍崔慧景平南將軍督衆  
軍南討十二月甲申顯達至都宮城嚴警已酉斬顯  
達傳其首餘黨盡平

南史

陳顯達傳云聞都下大相殺戮徐孝嗣等皆死遣兵  
襲江州顯達懼禍十一月舉兵欲直襲建康以掩不  
備又遙指郢州刺史建安王寶寅為主朝廷遣後軍  
將軍胡松等據梁山顯達率衆數千人發尋陽與松  
戰於采石大破之都下震恐十二月潛軍度取石頭



顯達馬稍從步兵數百人於西州前與臺軍戰再合  
大勝稍折手猶殺十餘人官軍繼至顯達不能抗騎  
官趙潭注稍刺落馬斬之

二年

庚辰

冬十一月南康王寶融為荊州刺史戊午蕭衍

表勸南康王稱尊號不許

豫章書

和帝中興元年

辛巳三月

遼廢寶卷為涪陵王

秋八月蕭衍克尋陽九

月蕭衍引兵東下留鄭紹叔守尋陽

通鑑綱目

豫章書云初東昏侯遣陳伯之鎮江州為吳子陽等

聲援子陽等既敗蕭衍謂諸將曰兵未必須實所聽  
威聲耳今陳虎牙狼狽奔歸尋陽人情恟懼可傳檄  
定也乃搜俘囚得伯之幢主蘇隆之厚加賜與使說  
伯之許即用為安東將軍江州刺史伯之遣隆之返  
命雖許歸附而云大軍未須遽下衍曰伯之意懷首  
鼠及其猶豫急往逼之計無所出勢不得不降乃命  
鄧元起引兵先下楊公則徑掩柴桑衍與諸將以次  
進路元起將至尋陽伯之退保湖口留陳虎牙守湓

城衍至尋陽伯之東甲請罪初新蔡太守席謙父恭  
祖為魚復侯子響所殺謙從伯之鎮尋陽聞衍東下  
曰我家世忠貞有隕不貳伯之殺之行以伯之刺江  
州九月衍留驍騎將軍鄭紹叔守尋陽與伯之引兵  
東下謂紹叔曰卿吾之蕭何寇恂也前途不提我當  
其咎糧運不繼卿任其責比克建康紹叔督江湘糧  
運未嘗乏絕

南齊蕭穎胄傳云穎胄弟穎字在京師廬陵人修靈

祐

南史作修景智

竊將南上於西昌縣山中聚兵二千人襲

郡內史謝纂奔豫章穎孚靈祐據郡求援穎胄遣寧

朔將軍范僧簡入湘州南道援之僧簡進寇安成仍

以為輔國將軍安成內史拜穎孚為冠軍將軍廬陵

內史合二郡兵出彭蠡口東昏侯遣軍主彭益劉希

祖三千人受江州刺史陳伯之節度南討二郡義兵

仍進取湘州南康太守王丹保郡應益等穎孚聞兵

至望風奔走前內史謝纂復還郡劉希祖至安成攻

戰七日城陷倡簡見殺希祖仍為安成內史顓孚收  
散率據西昌謝篡又遣軍攻之顓孚敗奔尋卒後修  
靈祐合餘衆攻篡篡復敗走豫章希祖亦以郡降

梁

武帝天監元年

壬午和帝於  
四月被廢

夏五月江州刺史陳伯之

舉兵反以王茂為征南將軍江州刺史率衆討之六

月陳伯之奔魏江州平

武帝紀

伯之傳云伯之在州用鄧繕為別駕戴承忠為記室

參軍河南褚綰都下之薄行者投伯之大見親狎及  
伯之鄉人朱龍符為長流參軍並乘伯之愚闇恣行  
姦險伯之子虎牙時為直閣將軍武帝手疏龍符罪  
親付虎牙封示伯之又遣代江州別駕鄧繕伯之並  
不受命繕於是日夜說伯之云臺家府庫空竭無復  
器械三倉無米此萬世一時機不可失綰承忠等每  
贊成之伯之使綰詐為蕭寶寅書以示僚佐於聽事  
前為壇殺牲以盟豫章太守鄭伯倫起郡兵拒守程

元冲既失職於家合率數百人使伯之典籤呂孝通戴元則為內應伯之每旦常作伎日晡輒卧左右仗身皆休息元冲因其懈弛從北門入徑至聽事前伯之聞叫自率出盪元冲力不能敵走逃廬山伯之遣使還報虎牙兄弟虎牙等走盱台盱台人徐文安莊興紹張顯明邀擊之不能禁反見殺武帝遣王茂討之伯之敗走間道亡命出江北與虎牙及褚縉俱入

魏

伯之於五年  
復叛魏歸梁

普通三年

壬寅

冬十一月梁西豐侯

西豐今臨川縣地

臨

正德奔魏

既而逃歸

通鑑綱目

大同元年

乙卯

冬十二月鄱陽鮮于琮反內史陸襄討平

之

豫章書

陸襄傳云大通七年為鄱陽內史先是郡人鮮于琮服食修道法常入山採藥拾得五色幡旒又於地中得石璽竊怪之琮先與妻別室望琮所處常有異氣益以為神大同元年遂結門徒殺廣晉令王筠號上



顧元年署置官屬其黨轉相誑惑有衆萬餘人將出  
攻郡襄先已率人吏修城隍為備及賊至破之生獲  
琮

八年

壬戌

春正月安成妖人作亂三月江州司馬王僧辯

討平之

通鑑綱目

梁書張綰傳云安成人劉敬宮

綱目作躬

挾妖道聚黨攻

郡內史蕭悅棄城走賊轉寇南康廬陵屠破縣邑有  
衆數萬人進寇豫章新淦縣南中久不習兵革吏民

恒擾奔散或勸綰宜避其鋒

時為豫章內史

綰修城隍設戰

備募召勇敢得萬餘人刺史湘東王遣司馬王僧辯帥兵討賊受綰節度旬月間賊黨悉平

太清二年

戊辰

秋八月鄱陽王範密啓侯景謀反不報冬

十月侯景襲譙州執刺史豐城侯泰

範之子

十一月江

州刺史當陽公大心入援西豐公大春新淦公大成

入援敗績侯景擒大春十二月衡州刺史韋粲至廬

陵舉兵入援

豫章書

韋粲傳云帝召還為散騎常侍至廬陵聞侯景作逆  
便簡閱部下倍道赴援至豫章就內史劉孝儀謀之  
孝儀曰必如此當有勅安可輕信單使妄相驚動時  
孝儀置酒粲怒以杯抵地曰賊已渡江便逼宮闕水  
陸阻斷何暇有報假令無勅豈得自安韋粲今日何  
情飲酒即馳馬出會江州刺史當陽公大心遣使要  
粲粲乃分麾下配第八弟助第九弟警為前軍粲馳  
見大心曰上游藩鎮江州去都最近殿下情計實宜

在先但中流任重當須應接不可闕鎮今宜張軍聲  
勢移鎮湓城遣偏將賜隨於事便足大心然之遣中  
兵柳昕帥兵二千隨粲粲留家累於江州以輕舸就  
路粲外弟司州刺史柳仲禮亦帥步騎萬餘人至橫  
江粲即送糧伏給之并散私金帛以賞其戰士先是  
鄱陽王範亦自合肥遣西豫州刺史裴之高與其世  
子嗣帥江西之衆赴都屯於張公洲待上流諸軍至  
是之高遣船渡仲禮與粲合軍

明年粲及侯景戰敗死之

三年

巳巳五月  
梁主衍殂

冬十月梁豫章內史莊鐵叛襲江州敗

走

通鑑綱目

豫章書云初歷陽太守莊鐵帥衆歸尋陽王大心大  
心以為豫章內史鐵至郡即叛推觀寧侯為主永範  
之弟也鐵引兵襲尋陽大心遣其將徐嗣徽逆擊破  
之鐵走建昌光遠將軍韋約邀擊之鐵失其母弟妻  
子單騎還南昌

簡文帝大寶元年

庚午

春正月梁始興太守陳霸先進軍

南康邵陵王綸自鄱陽進至九江引兵西上假黃鉞  
都督承制夏四月湘東王繹移檄討侯景五月侯瑱  
殺莊鐵據豫章六月高州刺史李遷仕反馮寶妻沈  
氏討敗之遷仕走保寧都秋七月侯景陷江州及豫  
章冬十月侯景殺南康王會理同上

豫章書云陳霸先發始興至大庾嶺蔡路養南康將士豪

二萬人軍南埜以拒之路養妻姪蕭摩訶年十三單  
騎出戰無敢當者杜僧明馬被傷霸先救之授以所

乘馬僧明上馬復戰衆軍因而乘之路養大敗脫身  
走霸先進軍南康湘東王繹承制授霸先明威將軍  
交州刺史六月刺史李遷仕據大臯口遣使召高  
涼太守馮寶妻洗氏曰刺史被召援臺乃稱有疾  
鑄兵聚衆而後召君此必欲質君以發君之兵也  
願且無往以觀其變數日遷仕果反遣主帥杜平  
鹵將兵入瀨石城魚梁以逼南康霸先使周文育  
擊之洗氏謂寶曰平鹵與官軍相拒勢未得還遷

仕在州無能為也君若自往必有戰鬪宜遣使卑辭  
厚禮告之曰身未敢出欲遣婦參彼必喜而無備我  
將千餘人步擔雜物唱言輸賕得至柵下破之必矣  
寶從之遷仕果不設備洗氏襲擊大破之遷仕走保  
寧都文育亦擊走平鹵據其城洗氏與霸先會於瀨  
石還謂寶曰陳都督非常人也甚得衆心必能平賊  
君宜厚賁之

南史侯瑱傳云瑱隨範徙鎮潞城俄而範及嗣皆卒



項領其衆依豫章太守莊鐵鐵疑之項懼不自安詐引鐵謀事因刃之據豫章後降於侯景將于慶

尋陽王大心傳云侯景將任約略地至湓城大心遣司馬韋質拒戰敗績時帳下猶有勇士千餘人咸說曰既無糧儲難以守固若輕騎往建州以圖後舉策之上也其母陳淑容不從大心乃止遂與約和二年見害

黃法氈傳云陳武帝將踰嶺入援建鄴李遷仕作梗

中途武帝命周文育屯西昌法氈遣兵助文育時法氈出頓新淦縣景遣行臺于慶來襲法氈敗之

二年

辛未

春二月陳霸先討李遷仕殺之秋七月于慶自

鄱陽遷豫章侯瑱拒之走江州王僧辯克潞城江州刺史陳霸先引兵會之八月侯景廢梁主綱立豫章

王棟

同上

杜僧明傳云李遷仕與寧都人劉孝尚并力將襲南康陳武帝令僧明與周文育等拒之相持連戰百餘

日卒擒遷仕送武帝及帝下南康留僧明頓西昌督  
安成廬陵二郡軍事

豫章書云二年正月新吳余孝頃舉兵拒侯景

新吳縣屬

豫章隋省  
入南昌縣

景遣于慶攻之不克六月孝頃遣兄子僧

重將兵救鄱陽于慶走還豫章復走江州據郭默城

王僧辯乘勝下湓城陳霸先帥所部三萬人將會之

屯於巴邱

屬廬陵郡

西軍乏食霸先有糧五十萬石分三

十萬石以資之八月僧辯前軍襲于慶慶棄郭默城

走范希榮亦棄尋陽走湘東王繹命僧辯頓尋陽以  
待諸軍之集

元帝承聖元年

壬申是年十一月方即位改元

春正月湘東王繹遣王

僧辯等東擊侯景

同上

豫章書二月僧辯諸軍發尋陽舳艫數百里陳霸先  
帥甲士三萬舟艦二千自江南出湓口會僧辯於白  
茅灣築壇歛血共讀盟文流涕慷慨三月僧辯等平

侯景

景於四月伏誅

三年

甲戌十月元  
帝降魏被害

冬十一月王僧辯陳霸先等共奉江

州刺史晉安王方智為太宰承制

豫章書

敬帝紹泰元年

乙亥是年十  
月方改元

春二月晉安王自尋陽入

建康即梁王位

同上

永平元年

丙子

春正月梁遣兵擊侯瑱於湓城秋七月瑱

詣闕歸罪冬十二月以周迪為臨川內史

通鑑綱目

侯瑱傳云陳武帝誅王僧辯僧惜陰欲圖瑱而奪其

軍瑱知之盡收僧惜徒黨僧惜奔齊是時瑱據中流

甚強人以本事倡辭雖外示臣節未肯入朝初余孝  
頃為豫章太守及瑱鎮豫章乃於新吳縣別立城柵  
與瑱相拒瑱留軍人妻子於豫章令從弟齋知後事  
悉衆以攻孝頃自夏迄冬弗能尅齋與其部下侯方  
兒不協方兒下攻齋掠瑱軍府妓妾金玉歸於武帝  
瑱既失根本歸豫章豫章人拒之乃趨湓城就其將  
焦僧度僧度勸瑱投齊瑱以武帝有大量必能容已乃詣  
闕請罪武帝復其爵位

熊曇朗傳云侯方兒之反瑱巴山太守熊曇朗為謀主瑱敗曇朗獲瑱馬伏子女甚多

周迪傳云侯景之亂迪宗人周續起兵臨川梁始興

王蕭毅以郡讓續迪召募鄉人從之每戰勇冠諸軍

梁帥等殺續推為主紹泰二年

即太平元年

領臨川內史

黃法氈傳云太平元年割江西四郡

臨川安成豫章巴山

置高

州以法氈為刺史鎮巴山後蕭勃歐陽頎來攻法氈破之

二年

丁丑

春二月梁蕭勃起兵廣州次於南康丞相陳霸

先使周文育擊勃獲其將歐陽頎傳泰勃為其下所

殺

同上

周文育傳云蕭勃將舉兵踰嶺詔文育督衆軍討之

時新吳洞主余孝頃舉兵應勃遣其弟孝勵守郡城

自出豫章據石頭勃使其子孜將兵與孝頃相會入

遣別將歐陽頎頓軍苦竹灘傳泰據蹠口城

在南康郡之北

以拒官軍官軍船少孝頃有舴艋三百艘艦百餘乘



在上牢文育遣軍主焦僧度襲之悉取而歸仍於豫  
章立柵官軍食盡欲還文育不許使人遺周迪書約  
為兄弟迪甚喜許饋以糧文育分遣老小乘故船舫  
沿流俱下燒豫章所立柵偽遁孝頃望之大喜因不  
設備文育由間道信宿達萍韶築城饗士賊徒大駭  
歐陽頎乃退入泥溪作城自守文育遣嚴威將軍周  
鐵虎與長史陸山才襲頎擒之盛陳兵甲與頎乘舟  
而宴以巡傳秦城下因攻秦尅之蕭勃在南康聞之

衆皆股慄其將譚世遠斬勃欲降為人所害世遠軍  
主夏侯明徹持勃首以降蕭孜余孝頃猶據石頭武  
帝遣侯安都助文育攻之孜降孝頃退走新吳

陳

武帝永定元年

即太平二年十月始受禪改元

冬十月梁王琳及陳人

戰敗之獲其將周文育侯安都遂克江州

同上

王琳傳云琳將張平宅乘一艦每將戰勝艦則有聲  
如野猪故琳戰艦千數以野猪為名武帝遣將侯安

都周文育等討琳仍受梁禪安都歎曰我其敗乎師  
無名矣逆戰禽安都文育其餘無所漏惟以周鐵虎  
一人背恩斬之

二年

戊寅

春正月梁王琳伐陳次於白水夏五月琳伐臨

川不克秋八月侯安都周文育自湓城逃歸

同上

琳傳云帶甲十萬練兵於白水浦

屬湓城

琳巡軍而言

曰可以為勤王之師矣溫太真何人哉南江渠帥熊  
曇朗周迪懷貳琳遣李孝欣樊猛與余孝頃同討之

三將軍敗並為迪所囚安都文育等逃還建鄴

豫章書云新吳洞主余孝頃遣沙門道林說琳曰周  
迪黃法氈皆依附金陵大軍若下必為後患不如先  
定南川孝頃請席卷所部以從下吏琳乃遣輕車將  
軍樊猛平南將軍李孝欽平東將軍劉廣德將兵八  
千赴之使孝頃總督三將屯於臨川故郡徵兵糧於  
迪以觀其所為五月孝頃等屯二萬軍於工塘連八  
城以逼迪迪懼請和并送兵糧猛等欲受盟而還孝

頃貪其利不許樹柵圍之由是不協高州刺史黃法  
氈寧州刺史周敷合兵救迪敷自臨川故郛斷江口  
分兵攻孝頃別城猛等不救而沒劉廣德乘流先下  
故獲全孝頃等皆棄舟引兵步走迪追擊盡擒之送  
孝頃及孝欽於建康歸樊猛於王琳孝頃之弟孝勸  
及子公颺猶據舊柵不下詔周文育都督衆軍出豫  
章討之

三年

己卯

夏五月北江州刺史熊曇朗殺都督周文育舉

兵反王琳遣其將常衆愛曹慶率兵援余孝勳六月  
儀同侯安都敗衆愛等於左里獲琳從弟襲主帥羊  
疎等衆愛遁走廬山人斬之傳首建鄴

武帝紀

綱目云王琳遣將曹慶攻周迪敗之文育退據金口  
曇朗因其失利殺文育而併其衆周敷擊破之曇朗  
單騎奔巴山十一月琳聞陳高祖殂奉梁主莊出屯  
濡須口攻大雷陳遣侯瑱侯安都及徐度將兵禦之  
吳明徹夜襲湓城琳遣任忠擊明徹大破之引兵東

下

明年琳敗績與梁主莊帝奔齊

文帝天嘉元年

庚辰

春二月遣太尉侯瑱鎮湓城三月江

州刺史周迪平南中斬賊帥熊曇朗傳首建鄴秋九

月周將獨孤盛領水軍趣巴湘與買若敦水陸俱進

太尉侯瑱自尋陽禦之

文帝紀

三年

壬午

春二月江州刺史周迪舉兵應留異三月以安

右將軍吳明徹為安南將軍江州刺史督衆軍南討

秋九月周迪請降

同上

綱目云初陳主徵迪出鎮潁城不至豫州太守周敷獨先入朝進號安西將軍給鼓吹女妓金帛還豫章迪不平陰與留異相結遣兵襲敷敷與戰破之閩州刺史陳寶應亦陰與異合乃以吳明徹為江州刺史督黃法氈周敷共討周迪

四年

癸未

春正月周迪走投陳寶應納之秋九月迪復寇

臨川詔護軍將軍章昭達討平之

同上

綱目云周迪衆潰奔晉安復越東興嶺

在臨川郡南城縣界為



寇護軍章昭達將兵討破之迪潛竄山谷民相與匿之雖加誅戮無肯言者

五年

甲申

冬十月周迪誘陳南豫州刺史周敷殺之

通鑑綱目

豫章書云周迪復出東興錢肅降吳州刺史陳詳兵大敗迪衆復振南豫州刺史周敷帥所部擊之至定州與迪對壘迪給敷曰吾昔與弟戮力同心豈規相害今願伏罪還朝因弟披露心腑先乞挺身共盟敷許之方登壇為迪所殺

六年

乙酉

秋七月臨川太守駱牙斬周迪傳首建鄴

文帝紀

豫章書云遣都督程靈洗自鄱陽別道擊周迪破之  
迪與麾下十餘人竄山谷中後遣人潛出臨川市魚  
鮓臨川太守駱牙執之令取迪自劾因使腹心勇士  
隨之入山其人誘迪出獵勇士伏道傍斬之

按陳書駱牙本傳牙以晉陵太守遷冠軍將軍臨  
川內史非太守也

宣帝太建五年

癸巳

冬十二月詔熊曇朗周迪等及王琳

首並還親屬以弘廣宥

宣帝紀

後主至德二年

甲辰

冬十一月使南平王嶷鎮江州

南史

禎明三年

己酉

隋師濟江宜黃侯慧紀率將士三萬人船

艦千餘沿江而下欲趣臺城遣南康太守呂肅將兵

援巫峽以五條鐵鎖橫江肅竭其私財以充軍用

陳書

列傳

隋

文帝開皇九年

己酉

春正月滅陳獲其主叔寶

通鑑綱目

隋書王世積傳云平陳之役以舟師自蘄水趣九江  
晉王已平丹楊世積移書告諭陳江州司馬黃德棄  
城遁世積至豫章太守徐璿廬陵太守蕭廉尋陽太  
守陸仲容巴山太守王誦安成太守王瓘鄱陽臨川  
守將並詣世積降

韋洸傳云陳平拜江州總管率步騎二萬略定九江  
陳豫章太守徐璿據郡持兩端洸遣開府呂昂長史  
馮世基以兵相繼而進既至城下璿僞降夜率所部

二千人襲擊昂昂與世基合擊大破之擒瑋於陣

十年

庚戌

冬十一月樂安蔡道人饒州吳世華皆自稱大

都督詔上柱國內史令越國公楊素討平之

文帝紀

楊素傳云賊帥汪文進自稱天子據東陽署其徒蔡道人為司空守樂安進討平之

裴矩傳云奉詔巡撫嶺南汪文進等相聚作亂吳越道閉矩請速進至南康得兵數千人時俚帥王仲宣逼廣州遣其部將立九柵屯大庾嶺共為聲援矩進

擊破之

煬帝大業十二年

丙子

冬十二月鄱陽林士弘稱楚帝據

江南

通鑑綱目

江西大志云冬十月鄱陽賊帥操師乞自稱元興王  
建元始興攻陷豫章郡以其鄉人林士弘為大將軍  
詔治書侍御史劉子翊將兵討之師乞中流矢死士  
弘代統其衆與子翊戰於彭蠡湖子翊敗死士弘兵  
大振至十餘萬人十二月士弘自稱皇帝國號楚建

元太平遂取九江臨川南康宜春等郡

宜春置郡在大業初

豪

傑爭殺隋守令以郡縣應之其地北自九江南及番

禺皆為所有

按煬帝本紀云鄱陽賊操天成舉兵反自號元興  
王建元始興攻陷豫章郡唐書林士弘傳則云隋  
李興鄉人操師乞起為盜師乞自號元興王建元  
天成據豫章蓋隋紀悞以年號為名而大志亦未  
覈僭元之實也

十三年

丁丑即代王  
伯義寧元年

冬十二月蕭銑取豫章林士弘退

保餘干

通鑑綱目

豫章書云方與賊帥張善安襲陷廬江郡因渡江歸  
林士弘於豫章士弘疑之營於南塘上善安恨之襲  
破士弘焚其郭郭而去士弘徙居南康蕭銑遣其將  
蘇胡兒襲豫章克之士弘退保餘干



江西通志卷二十九